

碧城仙館詩鈔

一







叢書集成

初編

主編者
王雲五

商務印書館發行

本館據靈鷲閣叢
書本排印初編各
叢書僅有此本

碧城僊館詩鈔目錄

卷一

古今體詩八十八首

卷二

古今體詩八十七首

卷三

古今體詩七十四首

卷四

古今體詩八十八首

卷五

古今體詩七十四首

卷六

古今體詩九十七首

卷七

古今體詩一百八首

卷八

古今體詩八十七首

碧城僊館詩鈔卷一

清 錢塘陳文述雲伯撰

仿宋畫院製團扇

江南三月春風歇。櫻桃花底鶯聲滑。合懽團扇翦輕紈。分明採得天邊月。南渡丹青待詔多。傳聞舊譜出宣和。入懷休說班姬怨。羞見曾憐謝女歌。班姬謝女今何有。攜來合付纖纖手。闌前撲蝶影香遲。花閒障面徘徊久。樓臺花鳥院中春。馬畫楊題竟逼真。歌得合歡詞一曲。不知誰是合歡人。

續江醴陵雜體詩三十首

謝吏部眺 省直

明星低鴛鴦。華月麗鳩鵲。仙露潤金掌。春烟羃紅藥。離宮遙風吹。周廬下魚鑰。蓮漏遞壺箭。蘭綺靜鈴索。嗟予淡泊人。奉官畏薄弱。爐香挹粉署。封事達黃閣。漸此鳴玉登。思得投簪作。初服踐素心。春山臥雲壑。

王寧朔融 遊邸

遨遊陶嘉晨。淡泊究玄理。曳裾金張門。列輦田寶里。朱門關行馬。珍木蔭新雉。藻繪麗金鋪。蘭桂覆瑤庀。圓沼儵魚上。柔條文禽起。會食羅鼎彝。列坐覽書史。得性謝天伐。悠哉味彌旨。

江記室淹 楚望

瀟湘澹無際。空水自徘徊。衡陽雁初過。巫山雲不來。斑竹美人怨。蘭芷騷人哀。蒼梧弔舜祠。章華登楚臺。荆門上明月。故宮生綠苔。簫鼓逝陳迹。羅綺紛塵埃。唐宋渺難作。望古空悠哉。

梁簡文帝綱 閨思

秋水蕩迴波。秋雲寒薄羅。空牀冷文簾。圓規銷畫娥。杏梁留燕少。珠箔飛螢多。搗衣愁逐杵。織錦淚隨梭。繁霜下玉樹。寒燼辭金荷。月生青海劍。葉落榆關戈。莫言妾夢短。夜夜在交河。

梁元帝釋 述懷

笳鼓荆門震。樓船鄂渚橫。瀟湘堪飲馬。巫峽正屯兵。雍狐衛辰蓋。燕犀出子城。桃花小隊馬。蘭葉中央旌。壯士長榆塞。將軍細柳營。銅駝晉南渡。朱鷺漢西京。擊楫祖述志。麾扇顧榮情。各厲澄清志。終看日域平。

沈特進約 三日

令節正元已。芳期值上旬。鶯花洛陽道。車馬長安春。珠袍柘枝彈。繡纈茱萸輪。采芳槐里市。修禊蘭池濱。投壺笑玉女。捧劍出金神。流波漾卮羽。歌吹動梁塵。細雪桐花落。圓錢萍葉新。脩楊連小苑。芳樹入平津。歡娛不辭晚。遨遊貴及辰。緬茲萬壽獻。重以百福臻。年芳悵遲暮。應復眷佳人。

范僕射雲 貽友

朝出耘東田。暮歸下南岡。村墟生夕煙。平楚餘頽陽。稚子牽衣言。有客來東方。綰組復影纓。珠玑生輝光。殷勤重致辭。良久遲中堂。審聽知是君。寸心感傍徨。縞紵訂僑札。雞黍信范張。石交一窮達。古義今益彰。

附書南飛雁。夢寐同翱翔。

邱中郎遲 宴別

魚鑰開九門。鸞輿戒七萃。風清轉翠華。林長通羽騎。帷宮麗平野。鳴笳叶流吹。龍旗列玉仗。虎竹頒金瑞。名藩介弟資。重鎮淮甸寄。國典隆展親。皇眊重明試。免茲報政期。陳規申古義。

柳吳興暉 擣衣

月照蜘蛛屋。星低蟋蟀堂。殘香溫羅薦。華燭明蘭房。流雲韜絳河。清露凝紅芳。冰絃絙寶瑟。玉筯啼繁霜。霜飛冷翠幃。落落黃金徽。空房妾獨處。遠行君未歸。流黃五雜組。織素九張機。憐妾心有結。念君寒無衣。空庭夜岑寂。蟲聲出東壁。默默腸九迴。斑斑淚雙滴。尙記身短長。不知體肥瘠。擣衣復擣衣。擣衣心惻惻。惻惻復悽悽。樓頭烏夜啼。急節斷還續。繁聲高復低。織錦秦川女。停針竇氏妻。纔聞說薊北。忽又夢遼西。西北路迢遞。極目關山寒。尙恐貂裘薄。敢念鴛衾單。書託早鴻去。信盼雙魚還。秋雪龍沙夜。憐君憶妾顏。

庾度支肩吾 侍宴

芳苑帷宮啓。華林帳殿開。珠旗柳外見。玉輦花間來。新豐隣鄠杜。太液接蓬萊。月駟並鑣列。風鳥平翅迴。桐乳潤宿露。草帶長春荂。萬方賜酺宴。羣工分袂盃。曼衍魚龍戲。班聯鸕鷀陪。東京繼文藻。西園思上才。陽春頌明德。終是遜鄒枚。

何水曹遜 示寮

平楚層陰合。長林晚烟聚。空江澹微波。落日隱遙樹。初月起秋旻。殘星下巖霧。斷峽猿競啼。澄潭鴈飛度。境曠絕諸妄。神清瑩百慮。漂搖古原上。疲馬識征路。雲嵐思故山。撫景時一遇。眷此壯士懷。慨焉悵遲暮。長辭石渠彥。采采木蘭露。

蕭東陽子雲 望春

修陰夾槐里。香風生蘅臯。登高遠目縱。流盼春情翺。文鶯選綠樹。綺燕嬌紅桃。遊女朱輪馳。公子華纓飄。采藍中谷近。拾翠迴塘遙。寶馬嘶桂勒。畫輪引蘭橈。病臥懷藍田。眷念中心切。

虞長侍羲 北伐

嫖姚度絕幕。車騎出長城。長城萬餘里。落日烟塵生。暗風塞馬嘶。驚沙隴鴈鳴。玉帳起寒色。金笳沉夜聲。壯士空同劍。漢將天山旌。偃月築堅壁。長星貫敵營。闕支泣紅粉。當戶紮元纓。龍沙淨埽穴。狼望快犂庭。瀚海舊垂績。燕然新勒銘。金人朝漢闕。玉馬獻周京。靈臺方偃伯。武庫長銷兵。功成報天子。偉烈邁千齡。

吳朝請均 春怨

珠簾朝日升。羅幌微風扇。金枕閒空牀。銅鋪鎖深院。綺樹初留鶯。雕櫳又來燕。衣薄寒瑤璫。袖長觸寶釧。檐柳罥紫釵。鏡花消翠鈿。曉妝愁不成。午坐繡初倦。行藥遲中庭。看花怯遙甸。芳期度寂寞。春闈等秋殿。征人萬里餘。相思那能見。欲寄隴頭書。歸程託春鴈。

徐內史悱 酬友

長河迴一曲。太華削三峯。雙龍樹華闕。五鳳建曾宮。宜溫煥列宿。曠曉驗別風。仙波流太液。靈草植唐中。金爵觚稜上。銅盤沆瀣濃。飛甍接陽馬。複道亘雄虹。綺陌褻斜帶。金溝灞滻通。少年三輔俊。結客五陵雄。長執侍郎戟。能挽壯士弓。恥邀劇孟侶。思建嫫姚功。歸來畫麟閣。劍佩自雍容。

劉祕書孝綽 歸沐

暫容辭禁籞。休暇美遨遊。徘徊望省闕。宮觀鬱然稠。周廬滿上蘭。馳道暗長楸。金壁麗華闕。采恩隱層樓。鷓鴣翼宣室。蓬萊濫瀛洲。玉泉上文鯨。珠樹鳴春鳩。嗟予巖壑姿。羈宦心煩憂。雕龍非爽侶。吐鳳豈雄儔。世網懼見撻。初服何能酬。灞水引蘭櫂。杜陵鳴華輶。絃桐奏落日。簫鼓遲中流。未遑謝軒冕。聊以慰三秋。

劉庶子孝標 詠月

絡角長河掩。高城清漏殘。濃陰轉綠桂。微露霽紅蘭。輝分圓鏡滿。影入高樓寒。涼暈蕩珠箔。明輝流玉關。極浦雁初下。長征人未還。鄉書盼不到。寒衣寄亦難。中庭怨砧杵。孤枕夢刀鐮。龍城三五夜。應復倚弓看。

庾開府信 詠懷

橘柚南中樹。胭脂北地花。羈心悲去國。旅夢易還家。玉塞空春色。金陵幾歲華。江山懷鳳闕。風雨暗龍沙。寒聲驚朔雁。客情愁暮鴉。惟餘王粲恨。極目此天涯。

陳後主叔寶 稷飲

佳節啓宸苑。芳春遊近畿。瓊樹隱琴蓋。瑤林出畫旂。金溝綠水漲。玉殿青樽移。鶻浮羽自捷。波激珠連揮。

桂月掩歌扇。蘭雲裁舞衣。簪纓美華飾。執綺生光輝。花花各異色。燕燕自交飛。懽洽盛文藻。既醉莫言歸。

徐僕射陵 春情

暄回薄寒減。晝長春困降。草長藤蕪村。水落芙蓉江。蛟蜃上玖砌。蜻蜓窺畫牕。池鏡落花照。風簾來燕雙。香痕冷金鴨。燈穗消銀釭。辜芳惜日暮。何處採春芒。

沈侍中炯 自傷

蘇武悲殊域。崔駰憶舊鄉。中原異疇昔。行子意摧傷。狼望花疑雪。龍堆月似霜。金輿怨蕭瑟。玉殿動悽愴。鶯花廢苑舊。燕麥故宮荒。井邑空遺迹。河山弔夕陽。通天臺下客。祇自怨興亡。

陰常侍鑾 送別

風花迎去舳。烟水盪迴橈。遠浦歇朝雨。空江生晚潮。烟迷揚子渡。雲暗石城橋。別意滿芳樹。離情繫柳條。遊子悵行邁。羈人惜路遙。乍幸萍水合。各惜飛蓬飄。金尊薦華袖。銀箏怨綠腰。行旌隨去雁。極目駐蘭鑣。

張散騎正見 汎舟

芳渚乘新漲。流波蕩畫紋。蘭橈全倚水。桂棹半圖雲。花氣風隨合。秋陰雁共分。仙靈疑汜洛。鱗鱗憶橫汾。菱謳遙渚動。蓮唱別舟聞。翠被焚香夜。還應羨鄂君。

江僕射總 羈思

寒霜晨雁急。衰柳夜烏啼。故國悲烟雨。家山泣鼓鼙。玉樹花枝斷。蒼梧雲影低。春江潮寂寂。秋閣草萋萋。

紅綃遺舊製。璧月失前題。吳語幾能慣。越吟空自悽。金陵王氣盡。還復弔青溪。

魏特進收 喜雨

油雲暗遙嶺。微風轉前庭。山中石燕舞。屋角斑鳩鳴。碧滋苑樹重。紅潤檐花輕。午陰消翠幙。夕涼生畫屏。簾櫳密絲織。池沼圓波生。聊將雲漢意。稍酬望歲情。

盧武陽思道 贈別

博望河源遠。長卿蜀道難。何如秉漢節。西去鎮秦關。金尊別酒盡。玉鑿驪歌殘。飛雨雁邊下。橫雲馬上看。明星華嶽樹。曉月黃河灣。冰開素滻動。雪霽藍田寒。茂林花定發。灞岸柳堪攀。舊里沒文礎。荒池起廢蘭。非尋金馬去。詎訪碧雞還。會邀明主賜。珪璧琢明玕。

李內史德林 銷夏

虛堂初下露。水榭自生煙。疏牕薄帷動。密樹繁陰圓。流黃珍簟滑。疊雪香羅妍。扇中秦女鳳。枝上魏宮蟬。寒綠自沉李。輕紅初上蓮。及此陶嘉日。林塘晞髮眠。

隋煬帝廣 塞宴

狼河烟不動。龍堆花自春。仙雲玉帳繞。麗日朱旗殷。單于祝曼壽。樹支稱至親。天山空事漢。長城應過秦。從今絕域外。不復祭金人。

楊楚公素 山齋

素襟避塵囂。樓山事卜筮。紅泉澄空潭。翠礪澹深谷。碧鳳馴疏桐。蒼颯響修竹。風來藥苗香。日下松陰綠。聊用適性情。非爲耽幽獨。抱琴遲素心。江湖遠高躅。

薛司隸道衡 酬憶

別緒雲霄路。羈懷江海人。嗟予猶滯洛。念子獨遊秦。秦關卽長道。望遠心如擣。花紅芳甸暄。波綠春江曉。曉夢託相思。悠悠不可期。碧落金神掌。明星玉女祠。祠前雲樹斷。采藍嗟不見。日暮憶王孫。空梁有來燕。

詠美人六首

美人如明月。三五光徘徊。露下玉階濕。風颺羅幃開。麗華桂枝曲。嫦娥明鏡臺。珍重慰寂寞。流照上青苔。
美人如碧雲。縹緲雲中君。絳河麗妙鬢。碧落敷華髮。卷衣誤秦女。迴風疑洛神。日暮盼不極。一片陽臺春。
美人如名花。可翫不可褻。穠芳豔春霞。幽姿澹秋雪。綽約束腰素。玲瓏生眼纈。懷袖拂留英。三年香不滅。
美人如香草。相得愛同心。臨疏擷芳杜。人遠瀟湘深。忘憂夙所懷。合歡匪自今。古調響空谷。哀絃彈青琴。
美人如異書。古豔無由俗。相對一樽酒。夜靜焚香讀。塵心澹欲無。勞生願亦足。努力愛華年。無事此爲福。
美人如青山。相依欲終老。秀色雙蛾眉。中隱此中好。鋼疾深烟霞。凡心謝蓬島。睠茲一心人。玉顏願長保。

江南樂

江南樂。楊柳桃花滿城郭。臨水家家開畫閣。碧紗虛牖繡羅幕。玉鈎半挂眞珠箔。如花女兒花灼灼。眉影彎環腰戍削。春衫稱身身綽約。玻璃酒船門外泊。鸚鵡之箋鷓鴣杓。紅梁碧醴隨意酌。玉簫金管兩頭作。

國手無雙弄絃索。丁丁細聲私語託。晚霞銜山白日落。明燈照臉紅暈薄。鴛鴦無聲春漠漠。人生無如江南樂。

花蕊夫人詞

摩訶池上蘭橈起。雪香扇底秋如水。太平天子最風流。不愛花枝愛花蕊。翠鈿蕭條葬太華。後宮領袖屬徐家。冰肌玉骨清無汗。國色爭推解語花。香囊四角流蘇帳。幷宮彷彿前朝樣。恩重鴛鴦第一人。春風不羨羣花放。親奉蟠桃酒一杯。涼生水殿暗香來。宮詞百首追王建。絕代芳華絕世才。紅梔子綻真珠匣。翠
恩六鶴圍銅沓。錦地橫鋪白玉階。牙牀深鎖黃金閣。九曲龍池卅六宮。五雲高閣坐當中。錦官城郭芙蓉色。不及朝霞一鏡紅。百花潭水春波冷。芳晨從駕紛紛都雅。映水龍舟島嶼中。隔花鳳輦樓臺下。豈知轉眼陣雲黃。高髻朝天兆急粧。燕子砑前無戰壘。龍神祠外失浮梁。四十萬人齊解甲。可憐馬上宮腰怯。故宮望斷不歸來。一樣傷心悲建業。慷慨猶傳應詔詩。蛾眉原不媿男兒。流傳譚語何人筆。半闕葭萌驛壁詞。故君恩重留殘畫。宜男每下張仙拜。燭影搖紅慣負心。青溪劍血尤無賴。別有嬋娟未受恩。巉巖劍閣肯捐身。黃金欲買西川錦。織出當年殉國人。蜀宮人袁蓮。花蕊夫人侍兒也。國亡。夫人入宋。袁不肯從。過劍閣。自投崖下死。其壁處石上。點點作珊瑚斑。卽靈骨所托也。見薛皆山香

聞遺集

春閨怨四言詩

金微路遠藁砧不歸。啼鴛破夢落花自飛。空階無人迴風吹衣。

翫風怨

妾初奉君宴。嬌若芙蓉花。細骨復輕軀。縹緲凌飛霞。碧纜輕試鳳。香塵不霑鴉。珍珠賜百琲。舞袖生光華。妾齒日以長。君情日以疏。秋風冷後房。明月窺前除。脫我金縷衣。疊我香羅襦。聞君交州回。新得美顏姝。別起三成樓。朝日耀金鋪。置之同心帳。香囊下流蘇。贈之百寶釵。珊瑚間明珠。玉壺薦芳醴。金盤膾鯉魚。新人年幾何。十五頗有餘。玉顏願長保。君恩終不渝。

摩多樓子

長征十萬人。遠行八千里。秦山復楚山。隴水更湟水。山高水復深。日暮愁人心。西望風塵色。東流嗚咽聲。道遠夢難越。邊風與邊月。邊月照刀鐔。邊風吹馬骨。

達摩支曲

素手縑絲絲不絕。寶刀斷流流更急。今人心豈古人意。昨日花非前日色。君不見秦皇虎視何雄哉。美人置酒臨高臺。地下已看牧兒入。海上不見童男回。又不見漢武求仙乏仙骨。甲帳珠簾冷秋月。茂陵松柏摧爲薪。王母桃花又成核。

詠鏡

明鏡如明月。朝朝照面寒。曾將兩人影。同向此中看。自別秦臺鳳。常聞珠樹鸞。菱花莫輕拭。雙淚落沅瀾。

雲鞞孃詞

蝶銷軟碧鳳裘綠。約髮花冠偏髻玉。絕代風流雲鞞孃。天人照耀矜裝束。分明玄女握兵符。號令精嚴指
臂驅。十隊分行豔氈毼。七人合伍燦氍毹。雲絲萬縷春愁疊。橫刀侍女胭脂頰。一騎紅裝趨雪馬。來迴風
香散泥金蝶。曾是岑家幾葉孫。雲臺畫像拜星辰。浮家浩渺殊龍戶。林邑淵源異馬人。石峒春迴花萬樹。
金釵十二敲銅鼓。天姬自結鴛鴦囊。苗女能爲鸚鵡舞。蘆管鳴嗚咒越巫。雲陽擊節祀槃瓠。枕榔麪代仇
人首。勸客綢繆任小姑。兵籍分排編四姓。撞丁矯捷狼兵勁。繡卓夫人城上旗。風行娘子軍前令。關扼昆
侖第幾重。松陰古路百盤通。麻蘭道遠春雲暗。榕樹門深墨瘴濃。灘江湘水烟波渡。半是騷人舊遊處。海
棠橋畔少遊來。藤蔓巖前謫仙去。宜州雙鳳舊飛迴。疊綵山高銀殿開。葛令丹砂何地覓。趙王神劍至今
埋。從來國色生仙境。清溪慣照娥嬋影。窳聲人憶綠珠祠。芳草誰尋玉環井。蛇鎗鳩箭各精良。繡面花蠻
小部強。未必威名輸石砧。當年底事不勤王。南海狂生才不偶。隻身西向蠻天走。金雞窺上獨看花。綠鴉
山下頻攀柳。三尺枯琴太古洞。冰絃聲徹海天空。深山虞帝還祠廟。落日驩兜有故宮。荔浦蘅皋盡經歷。
銅柱連天鬼門黑。祇有蛾眉解愛才。玉帳談兵煩草檄。淋漓墨瀋濕羅裙。仙洞桃花日暮雲。臺榭高寒顏
太守。樓臺金碧李將軍。生平遭際悲家國。匣中寶劍青蛇色。夜雨詩寒木客吟。月明詞好斑衣織。許傍相
思寨畔居。翩翩書記幸何如。奇方學治金蠶蠱。異味親嘗白妾魚。銷魂豈獨芙蓉髻。如此解人良不易。仙
壇微諷杜陵詩。神嶽親藏衛公字。沉吟赤雅寶新編。雀扇珠衣望儼然。迴首蒼梧雲萬疊。夢騎北鶴訪獠
僊。

秦女卷衣

鴻臺白日長。蘭池春草芳。不奉君巾烏。但卷君衣裳。羅熏亦有迹。錦薦自生香。敢拂珊瑚枕。虛窺白玉牀。遺憐六宮女。從未夢容光。

愛妾換馬

蛾眉雙柳葉。駿骨一桃花。逸足飛黃卓。仙容萼綠華。龍媒長入廐。鳳髻永辭家。雖自逢知己。餘情戀正賒。

西溪水仙詞

瓊樓明月玉階花。十二珠簾卷暮霞。禮罷瑤壇歸路近。碧城原是舊兒家。小謫紅塵亦偶然。此身曾住有情天。而今綺業消除盡。管領梅花作水仙。銖衣楚楚佩珊瑚。小步天風怯暮寒。一曲冰絃響秋雪。魂銷十二曲闌干。西溪寒水碧稜稜。疏影昏黃照未曾。七十二峯殘月落。夜寒花氣半成冰。長簾空牀黯不收。燕泥零落舊香篝。昨宵跨鶴歸來處。魂斷城南舊畫樓。春雨闌珊一夢醒。燭花紅上畫羅屏。祇應月落參橫夜。消得金函一卷經。秋墳低倡鮑家詩。日暮寧芳弔竹枝。欲覓青鸞寄花葉。雨雲何處小姑祠。輕黃月落照嬌鬢。澹掃蛾眉學遠山。不信迴腸如澗曲。仍流幽恨到人間。芳魂應已化寒梅。鬱鬱埋香土一坯。不盡人間兒女恨。年年花落與花開。

杏華宮纈藕絲裙。人比芙蓉瘦一分。半幅冰綃留小影。夜深長把佛香熏。

晚霞

晚霞更比曉霞殷。變後江雲態轉閒。暮色濃遮千里樹。斜陽澹寫六朝山。詩情秋水羅羅外。別意春星脉脉間。有客天台曾作賦。赤城如畫夢中還。彷彿明裝絕代姿。碧雲四合意遲遲。江陵城郭人何處。海國樓臺我所思。暮雨漸收神女廟。晚煙初上水仙祠。青天盡作芙蓉色。愁煞南朝小謝詩。澄江倒影暮生寒。瑟瑟微波著意看。散處尙成餘綺豔。染來宜稱薄羅單。酒邊詞客題孤鶯。夢裏遊仙跨采鸞。最憶晚裝高閣上。玉人同泥畫闌干。雲錦催成五色花。鱗鱗魚尾射平沙。鋪將丹地星妃宅。織出璇機帝女家。淺碧吳天橫去雁。斷紅楚樹送歸鴉。不須惆悵春痕晚。清夜西園月最華。

鴛鴦塚

何家郎。高家女。朝雲日出暮雲雨。一朝溝水將分離。郎心宛轉妾傷悲。雖然野鴛鴦。肯令南北東西飛。不得生相隨。甘心死相逐。一角春山埋曉綠。夜夜鴛鴦墳上宿。

月夜

滿身花影壓輕寒。雲散青天上玉盤。十二樓臺三五夜。無聊最是畫闌干。

邊將擬古

猿臂成功百戰勞。少年結客五陵豪。繡旗小隊橫飛騎。金鎖深宮出賜袍。紅柳關山春雪豔。黃榆壁壘夜星高。於今萬里狼煙靖。空有霜華上佩刀。

春詞

春水綠苔磯。春風花滿衣。櫻桃西舍熟。蝴蝶南園飛。金徽別調苦。玉關宵夢非。坐看紅襟燕。池上啣泥歸。

碧城三首。自題碧城仙夢圖。效李玉溪。

碧城深處隱紅霞。十二闌干屈曲遮。神女峯前雲是夢。嫦娥天上月爲家。春呼白鳳栽靈藥。曉乞青鸞掃落花。小錄名牋知第一。詩成親自寫瑤華。

吹笙其耐曉寒何。清淺蓬萊水又波。綃帳三生餘白石。紅牆一抹是銀河。閒拋銖珮歌長恨。曾曳霓裳詠大羅。最好芙蓉樓畔住。玲瓏玉樹總交柯。

雲英拜後拜雲翹。侍女雙鬟擁絳綃。冰縷冷調銀柱瑟。瓊花春放紫屏簾。白榆種作相思樹。烏鵲填成宛轉橋。一片飛鸞盡霞采。碧天如水易魂銷。

詠馬效昌谷

雲翦五花鬃。春槽首蓓紅。天閑十萬匹。第一是真龍。一瞥影超塵。昂藏八尺身。桃花名字好。不惜換佳人。

盤石立唐陵。鑄金森漢闕。碧落蕩華雲。房星明似月。
一顧鳴知己。秋風萬里心。生憎燕太子。只解擲千金。
珠絡錦連錢。珊瑚七寶鞭。少年美如玉。騎爾上青天。
莽莽陣雲開。笳聲動地來。西風吹匹練。直上白龍堆。

閒情

畫閣春光二月初。娉婷況是十三餘。鶯兒催起繡花史。螺子調成寫草書。香橙五紋教婢繡。春雲雙髻學
孌梳。自憐一種傾城色。譜盡羣芳總不如。
一庭紅雨萬花飛。親叩天台玉女扉。粉鏡曉寒梳子瘦。畫屏春雪牡丹肥。親題珠字貽綃帕。許讀迴文榜
錦機。底事天風吹袖急。霞綃翻亂五銖衣。
流蘇寶帳碧羅縫。髻影衣香記乍逢。怕我將離鉏芍藥。問誰及第種芙蓉。偷將隱語呼憐子。添得新詞唱
懷儂。如此樓臺如此夜。邨堪夢斷五更鐘。
雲鬢十八鞞宮鴉。倚檻新裝萼綠華。暖玉作膚非中酒。異香在骨不關花。鏡中濃笑書唐字。夢裏微詞說
謝家。容易相逢復相別。乘鸞空憶碧天霞。
玉蟾銅雀稱安排。位置端宜到玉臺。春氣泥人花綽約。神光留照月徘徊。願隨秦女吹簫去。曾聽湘靈鼓瑟來。只合大羅天上住。神仙畢竟解憐才。

珊瑚一水瀉銀河。知比愁多比恨多。握手幽期證圓月。斷腸心事託微波。塵生西閣銷金粉。花落南塘怨綺羅。自製明光三十段。揮毫題徧曉寒歌。
袂衣涼透不禁秋。金井鴉啼日暮愁。醉裏瓊花新玉簫。夢中璧月舊紅樓。三生陳迹如天遠。一片閒情似水柔。欲向寒梅問消息。兩山風雨隔羅浮。
往事無端恨洗紅。蓬山容易路曾通。銅鑲門掩桃花雨。玉押簾垂柳絮風。七十鴛鴦同命鳥。一雙蝴蝶可憐蟲。衍波翦取春江水。自記前緣證雪鴻。

國山碑歌

秣陵王氣浮春潮。鼎足三國開六朝。黃龍赤烏作年紀。紫髯帝子真人豪。八絕才人工繆篆。虞翻識緯尤稱善。侈將文采飾嘉祥。英雄兒孫亦豚犬。神魚者二神靈三。丹鸞白雀紛趁趕。祥經瑞牒千二百。居然天曜臨江南。大石俄聞立陽羨。玉檢金繩此封禪。奉使司徒說董朝。工書令史推蘇建。四十三行四面盈。臣修臣悌盡書名。不知著述何人筆。一卷文章敵長卿。金陵神識尤堪數。天發如鐘國山鼓。只誇符瑞不神仙。應勝秦皇與漢武。轉眼荒庵賸善權。西風一掬石城煙。可憐南嶽泥金日。虎踞龍蟠尙幾年。龍驤戰艦橫江表。降書再拜書臣皓。青蓋黃旗入洛陽。金函玉璧埋荒草。仙李巖前蛺蝶飛。野花開瘦綠苔肥。祝陵風雨銀龍泣。賸有樵人說國碑。

春日雜詩

玉鉤十二捲簾波。好放紅襟燕子過。一夜東風響檐鐵。小園今日落花多。
金鴨香銷午夢醒。夕陽扶影上紅亭。小園春盡無人到。鎮日彈琴有鶴聽。

夢游羅浮吟

仙鬢雙立天風迴。海濤捲雪羅浮開。瘦蛟吟月癡龍答。白雲一抹羅浮合。
羅浮之山四百峯。峯峯亂插青芙蓉。濕翠滿衣風浩浩。夢中識是羅浮道。冷雲臥地枝橫斜。月明光照千梅花。
梅花如雪月如影。美人翩跹衣袂冷。霓裳澹襯仙雲嬌。倚樹爲我吹瓊簫。瓊簫一曲聲嗚咽。滿地紛紛落香雪。
酌我酒。贈我花。雲中遙指仙人家。醉邀蝴蝶爲我舞。流珠簌簌月當午。一聲長嘯歸去來。側身東望思蓬萊。
四面花光暗成霧。月中不辨來時路。

董小宛像

射雉城南秋草綠。水繪園荒濺寒瀑。羅裙已作綵雲飛。畫裏依然人似玉。
玉人便是董雙成。倭髻嬋娟有盛名。雲魄月魂留小影。飄花零葉怨前生。
玉臺明鏡臨秋水。自惜芳華厭羅綺。世間但得有情郎。美人祇願爲情死。
側帽參軍正妙年。未曾識面已心憐。銀灣空闊無梁渡。織女黃姑各一天。
半塘春水流花片。畫梁淺夢隨春燕。眉語分明阿母知。花前記取初相見。
相見無端又別離。尊前遲賦定情詩。瑤光奪壻人何在。崔護重來又一時。
舉頭明月流光白。閒泛扁舟夜橫篴。如此簾櫳合有人。小樓紅出桐橋側。
問訊居然姓氏真。銅鑲親叩木犀門。登樓目斷殘燈爍。意外相逢感夙因。
相逢慘澹真疑夢。思母悲深先一慟。更訴

三年苦憶情。芳心隱隱留餘痛。憔悴飛蓬掩鬢蟬。香桃骨瘦更堪憐。披衣頓覺沉疴失。始信人天有夙緣。
三盤梳掠青絲織。病後娥媞倍傾國。來朝同上木蘭舟。願學鷓鴣長比翼。細雨孤帆一葦杭。初從陽羨下
丹陽。江山勝處同攜手。兩點金焦接混茫。秋期公子求名去。釵鈿密約丁寧架。歸來繡佛閉閒門。舞腰肯
學章臺樹。紅豆相思語綠鸚。妾身畢竟未分明。江湖歷盡風波惡。不惜尋君冒險行。是時白下方文戰。河
亭高會開芳讌。比肩應勝顧橫波。座中姊妹都心羨。還恐蠶絲解脫難。債臺高揭碧雲端。押衙鹵莽黃衫
誤。相對微聞永夜歎。虞山蒙叟風流主。佳偶河東好眉嫵。信手千金點石成。惜花同護鴛鴦譜。從此雙飛
永好逑。不勞西北望牽牛。玉梅萬樹橫香雪。特向花間起畫樓。璇題豔月鴛鴦字。闌干宛轉相思地。食譜
茶經次第修。樓中韻事仙郎記。讀徧宮詞又楚詞。手裁玉版寫烏絲。一編奩豔尤新異。千古紅閨絕妙辭。
丹青隨意都娟妙。小樹寒叢入斜照。一家女伴盡聰明。女羅圓玉應同調。龍涎珍重水沉賒。親製宮香學
內家。洗瓊婢閒新戒酒。折枝樣好自栽花。澆花寒汲銀瓶綆。愛花兼愛屏山影。人坐花中影亦香。枕函夢
繞秋雲冷。扣扣紅牋楷法逾。承顏大婦更溫柔。慣從畫苑書林坐。閒話黃山白嶽遊。新宮豈料開東冶。黨
魁北部難寬假。累人夫婿病愁多。急煞中朝阮司馬。風聲鶴唳總無休。纔過風愁水又愁。鐵騎橫江森玉
帳。高家兵馬在揚州。旌旗徧地知誰某。潦草弓刀半遊手。九死艱難辛一生。倉皇百口兵間走。渡江桃葉
總流離。小住鹽官又幾時。消渴文園原善病。中宵藥裹仗支持。經年烽火消亭堠。瓜洲殘壘苔花繡。全家
辛苦渡江歸。歸來荒圃還依舊。祇是蛾眉病已深。更番險阻總驚心。塵緣九載匆匆盡。海上神香不可尋。

曲闌空有明蟾照。裝臺無復低鬟笑。憶語哀詞總愴神。空牀長簟安仁悼。粉素淋浪畫扇殘。湘娥滴淚染
琅玕。張侯小傳吳郎誄。都作當年本事看。月明殘雪新詞麗。梅村老眼憐明慧。曾見驚鴻小影來。褪紅衫
子芙蓉髻。梨雲如夢冷江南。留得生綃玉一龜。蟋蟀聲中坏土在。披圖重憶影梅菴。

碧城僊館詩鈔卷二

琴心曲

珠簾窄地春燈紅。主人醉客邀春風。團圓明月夜三五。一庭花霧香濛濛。座中慘綠江南客。攜琴獨坐花
閒月。自譜新聲信手彈。細將舊事從頭說。蘭橈雙槳去年秋。曾向西湖載月遊。紅豆低吟波渺渺。白蘋閒
採水悠悠。高城夜靜沈魚鑰。桂華流影驚飛鵲。佳客相逢得許衡。詞人更復招孫綽。片片流雲送畫橈。高
樓何處夜吹簫。迴環梵宇排三塔。指點蘇堤認六橋。銀浦無聲沈萬籟。賓朋連襪邀情話。風月無邊鮑照
詩。湖山如此方干畫。午夜無聲月滿天。一聲柔櫓破孤烟。秋江三疊臨風弄。欲託琴心問水仙。紅牆隱隱
離宮近。樓臺金碧琉璃映。秋花深鎖六宮閒。夜烏夢穩雙隄靜。玉宇高寒展畫圖。此身濯魄到冰壺。夜山
如影人聲寂。瑟瑟西風瘦綠蕪。忽聞笑語花間出。兩美雙雙隄上立。顧影低徊若有情。月華如水秋衣濕。
對此蒼茫百感生。憑將幽意託瑤琴。冰絃掩抑焦桐語。寫盡相如曲曲心。最憐此際情難識。半是躊躇半
憐惜。人影遙隨花影流。芳心暗與琴心疊。羅帶風飄雲鬢斜。分明咫尺隔天涯。空教綠綺憐君意。何處紅
樓是妾家。苦向箏師詳姓氏。曲中暮雨依稀是。衣香人影最魂銷。一葉扁舟歸去矣。此時珠斗影闌干。囊
住龍腰不再□。獨對銀蟾愁不語。夜潮聲急海門寒。歸舟載取新愁重。玉釵惆悵牆東宋。天風環珮蕩餘
音。殘燈紅暈芙蓉夢。夢魂彷彿向瑤臺。依舊明粧約步來。涼月影中情縹緲。萬花深處意徘徊。花前月下

還相見。分將團扇遮嬌面。自言天上謫仙人。謝君深意空留戀。雞聲喔喔動晨光。一枕游仙未許長。自寫新詞憐蛺蝶。空將錦字託鴛鴦。從此段家橋畔路。愁過當時鼓琴處。滿地苔錢燕子飛。桃花門巷迷崔護。屈指相思秋復春。鏡中眉黛畫中身。祇應一片西冷月。曾照微波解佩人。我聞此言重太息。世閒萬事空陳迹。花月嫵緣事有無。情禪參破成鴻雪。我亦人間有半生。花間曾解唱雙行。月中人去琴聲悄。一曲長歌萬古情。

杏花

珍重仙林放未遲。玉欄羅幙覺相宜。穠華得氣先菖葉。消息催人問柳絲。碎錦舊聞裴令宅。霏英何處葛仙祠。日邊近荷東皇寵。紅上春風第一枝。隔巷簫聲喚賣錫。故鄉風景又清明。畫摹院體詩宮體。寒憶江城暖禁城。香壓帽簷花露重。艷銷衫袖酒痕輕。最憐聽雨高樓夜。一枕江南夢不成。細點消寒九九圖。脂痕紅暈雪肌膚。路迷太守爭春館。花落吳姬賣酒壚。廿四番風曾徧否。一雙新燕已來無。天桃穠李空顏色。未及蓬萊品格殊。細踏晴香緩著鞭。紫駟嘶斷綠楊烟。六街樓閣人如玉。十里旗亭望若仙。陌上冶遊曾有約。曲江春色自無邊。祇應小宋風流甚。贏得新詞萬口傳。

湖上謠

湖上可採蓮。蓮花清且鮮。朝花嬌欲語。暮花紅可憐。湖上可採菱。菱角浮復沈。兩角梳作髻。四角安作輪。秋水寒澹澹。采菱莫采芡。芡實剝雞頭。菱花照人面。晚波清瀏瀏。采蓮莫采藕。藕絲柔腸牽。蓮子苦心剖。儂亦不采菱。儂亦不采蓮。日暮蕩舟去。沙上鴛鴦眠。

隣家水榭

竹密秋聲早。蘭修夏氣清。不須白團扇。自有水風生。清淺漾朱霞。分明似若耶。鴛鴦雙宿處。新長並頭花。小雨涼新得。微波暑易消。黃昏新月上。簾底一聲簫。玉珮遲華燭。明璫捲碧羅。夜涼風定後。水底看銀河。

紅簾

簾波三尺漾玲瓏。湘碧何年換海紅。別淚誤拋珠幌上。軟塵不到畫樓中。香泥四面椒爲壁。樹影重檐桂作宮。最好銀燈照深夜。酒痕暈得粉光融。丁字橫陳紫氣浮。舊遊十里憶揚州。春潮紺雪花雙鏡。新月明霞玉一鉤。問字可容依絳帳。題名真合署朱樓。緋袍茜袖知多少。小隊笙歌擁夏侯。彷彿虛帷麗茜紗。回文應共赤欄斜。雙垂銀蒜遲春色。一片橫波誤曉霞。羅額繡鵝繙宋史。香襟歸燕認盧家。吹來幾點廉纖雨。疑是緇桃落晚花。

錦屏花幔鎖相宜。看碧成朱境轉奇。序寫玉臺吟玳瑁。粧窺金屋暈胭脂。白珠不結神君屋。珊瑚網疑穿越女絲。無意春風借顏色。已教壓盡萬花枝。

七夕

佳夕生微涼。商飈厲秋節。河漢聲西流。雙星阻靈匹。露下孤鶴驚。風定一螢出。花底吹參差。不覺滿身月。

定是

定是瑤臺最小身。慳因遷謫到紅塵。倚將桂樹知前世。種到芳蘭悟夙因。九曲屏迷三里霧。一簾花送六朝人。臨風大有驚鴻態。擬學陳王賦洛神。生小聰明性格嬌。一雙斑管未全拋。學修眉史偏多悟。解賦香奩不待教。擊節乍聞金釧響。沈吟閒倚玉鉤敲。瑣牕愛讀盧儲賦。四壁梅花炙硯抄。銀葉甜香細細薰。芳名真合署靈芸。春宜茂苑花千樹。人似揚州月二分。醉裏狂吟題翠袖。牕前流水學羅裙。珠簾日暮東風急。吹散巫山一片雲。香塵解爲印蓮躑。樂府行纏別有腔。玉冊評花名第一。瓊樓倚月貌無雙。龍涎暗爇回文鼎。蠟殼明窺梵字牕。何處春波催畫槳。胭脂匯畔木蘭艣。

漢李廣銅印歌

嗚呼飛將軍。數奇不封侯。結髮大小七十戰。惟餘一印千秋留。將軍起家良家子。得士能令士心死。無雙

才氣泣公孫。刁斗行軍安足比。雁門秋老生邊塵。將軍此印應隨身。篆文劃斷瀚海雪。虹光透出天山雲。紅沫稜稜上花暈。定爲將兵作符信。謝罪會鈴幕府書。酬功誰授梁王印。我聞漢文恭儉稱賢主。禁中頗牧思良輔。賈生不相廣不侯。縱遇高皇亦何補。又聞武帝恢雄圖。丁零鄯善開邊隅。但以私親酬衛霍。不使名將當單于。老去藍田甘棄置。東道行師復何意。一代威名右北平。但留螭紐旁邊字。銅花不覺摩挲久。當年曾綰英雄手。志士成功自古難。庸夫獲福從來有。君不見李蔡爲人居下中。肘後黃金大如斗。

奉華堂硯

玉蟾滴盡天水碧。琉璃寶匣螺花飾。紫雲細膩仙露寒。香姜銅雀無顏色。憶昔光堯南渡年。六宮祇候盡嬋娟。大劉妃子尤明豔。德壽宮中第一仙。頭銜先署紅霞帔。金鑲不羨中宮貴。畫筆朝摹補袞圖。內批夜錄蘭亭字。小妹風流貌最芳。羽衣愛作道家粧。玉笙吹徹雙花發。並蒂芙蓉侍玉皇。此硯當年雕石髓。揮毫題徧澄心紙。閱盡繁華七百年。一雙鸚鵡眼清如水。報恩高建梵王宮。樓閣高寒倚碧空。金輿鳳臆人何在。留得孤墳夕照中。鳳皇泉畔青山曲。萬樹梅花浸寒玉。閉關頌酒印空傳。春來芳草年年綠。百年小劫又紅羊。金粉飛灰海月涼。半壁江山留一硯。至今猶說奉華堂。

玉玲瓏石歌

石爲南宋花石綱之遺。昔在龔衛園侍御宅。陳迦陵浙西六家詞序。所謂玉玲瓏小閣是也。今宅歸姚小坡尙書家石存宅中。

五丁夜鑿峨眉脅。古雪凝寒碎雲葉。透風透月竅豁。中有紅羊趙家劫。趙家八葉世昇平。玉殿神霄良嶽成。不愛江山愛花石。黃封繹絡走神京。玉筍生雲仙露滴。半是仇池半靈壁。玉真宮畔石當花。紫筠軒外花扶石。此石雕鏤雲竇空。佳名不媿玉玲瓏。鐵絲遺卻珊瑚樹。未得相隨入汴宮。牟駝岡下烽煙至。勤王羽檄催征騎。六甲空煩北斗兵。兩宮不決南遷議。通德門前戰鼓搗。六宮啼煞斷腸花。太清樓帖岐陽碣。齊載明駝走傳車。青衣慘澹催龍馭。白溝紅杏傷心樹。一拳猶幸未承恩。不隨帝子冰天去。君不見瓊島平臨太液池。金元宮殿賸殘基。慶雲糾縵芙蓉瘦。都是當年汴水移。又不見繡女祠寒廣陵月。玉蘭花墮繁華窟。人間流落憶南朝。一樣傷心天水碧。落日青城起暮煙。錢塘遺事亦堪憐。苔花綠上宣和字。回首東京七百年。

招勇將軍寶刀歌

將軍姓阮氏。名玉堂。江南揚州人。今學使者內閣學士雲臺先生之大父也。以武進士。由侍衛官湖北參將。嘗從張經略廣泗。征辰州苗。大小數十戰。功爲諸將最。又嘗乞保降苗數千人。事詳閣學所撰行狀。家傳佩刀。呼嘯若神。譚讌之次。獲與觀覽。因成是篇。

風稜滿堂秋氣來。寶刀出匣驚龍雷。星辰搖搖海水立。白虹一劃青天開。將軍年少初通籍。執戟明光晨入直。腰閒三尺青芙蓉。英風顧盼生顏色。詔書命典荆江兵。獐花狁鳥迎雙旌。戰氛欲起白日暗。寶刀夜作潛蛟鳴。苗人鑄刀尺有咫。鵜膏如雪洗龍子。一夜狼煙九谿起。短刀林立三百里。萬夫斫陣聲震天。

將軍突出爲衆先。霹靂在手陰風旋。頭顱墮地輕於煙。九谿初定南山連。負嵎虎踞山之巔。絕險深入驚飛仙。降苗爭拜刀光前。將軍殺賊不殺人。量涵滄海全窮鱗。寶刀淬淨不復用。戰場花草生青春。恩深威重苗心死。從此苗真不反矣。甲兵洗盡事春農。匣中刀臥銀河水。淮南學士將軍孫。秋濤三折開龍門。家傳文武世忠孝。手編家乘書前勳。秋夜沉沉月如練。滿堂賓客開華讌。寶刀捧出四筵驚。一片寒光射人面。想當一決陣雲開。萬馬無聲激飛電。百戰歸來血洗稜。健兒十萬傳觀徧。吁嗟乎。古來戰績紀紛紛。殺戮成功從未聞。君不見秦國銳頭白豎子。又不見漢家猿臂李將軍。

夜坐同壽蘇作

倚竹得秋意。水風生夜涼。明河平苑樹。殘月下隣牆。綠茗破微醉。白蓮開妙香。飛星墮西北。心識是機槍。

聞笛

平蕪綠軟睡鴛鴦。吹徹愁心玉笛涼。明月一彎樓北角。自扶花影下斜廊。

柳如是初訪半野堂小像

媼姪小影雙蛾綠。尺五皂紗裹紅玉。尙書大婦河東君。豔名早冠章臺曲。憶昔初尋半野堂。玉顏烏帽學男裝。扁舟夜泛琴川水。萬樹梅花接影香。尙書養望才名大。黨魁北部曾稱最。一席雄談抵目成。流連文讌紛佳話。名士傾城願不虛。紅牙小印署蘼蕪。唱酬詩訂東山集。花月綠留西子湖。定情已作經年別。本事詩成前七夕。便欲佳期傲女牛。紅牕斜對銀河白。絳雲樓閣倚高寒。金屋藏嬌賦合歡。問到芳年悵遲。

暮春風重倚玉闌。金石千秋書萬卷。琳瑯都置粧臺畔。流水親調綠綺琴。墨香小試紅絲硯。湘簾不捲水沉熏。一縷爐煙裊篆雲。金甌十行繙貝葉。烏絲百幅寫羅裙。玉鏡涵秋豔眉嫵。肯把芳華付歌舞。天下風流獨有君。鼎足王楊妬弗許。漆室當年早抱憂。南都事業亦全休。尋來舊院無人在。話到新亭有淚流。園池不貯清流水。尙書強爲蒼生起。可憐白髮似紅顏。千古傷心艱一死。悔煞鸞篋絕頂爭。願從魚腹學湘靈。當年沈約曾親見。裙縵留仙去不成。後來北寺讒成獄。不惜艱難視餽粥。西臺自和大蘇詩。悲涼祇爲賢妻哭。屈指茸城賦雉媒。花枝紅豆幾番開。靈簫墨會評仙眷。翠羽蘭膏識異才。尙書手定詩人集。月照香嬰助編輯。千秋閨閣幾傳人。讀到遺編倍嗚咽。無端怪鳥叫嘻嘻。修曲辰樓舊夢非。絕似澄心悲一炬。羅幃灰作暮雲飛。左家嬌女芳姿好。向平願畢凡心了。生平家國恨無窮。披緇甘向空門老。流離六尺泣遺孤。族子陰謀肆鬼狐。國變纒經家難起。拚將一死報尙書。兒女英雄心激烈。肯學尙書甘負國。可惜黃門拒太深。丹心卻被明眸識。小幅桃花暈酒痕。眉樓亦有受恩身。嬋娟都被須臾誤。不作忠臣傳裏人。

斜日

斜日半湖陰。秋聲動遠林。微風蘋葉碎。涼露蓼花深。有客涉河漢。嗟余傷滯淫。祇應明鏡裏。照見古人心。

讀徐昭華集

西河弟子徐都講。受業親從傅是齋。粧罷譚經依絳帳。花前執贄捧金釵。六朝宮體思何綺。小幅迴文字亦佳。一代名媛此前輩。苧蘿春水自天涯。

春草

幾回山雨沃靈根。一片萋萋直到門。紅豆空迷遊子夢。玉鉤誰弔美人魂。踏來屐齒春無跡。望裏裙腰綠有痕。曾過當時送行處。祇應愁煞舊王孫。似我新愁不可刪。一簾春雨六朝山。人歸南浦輕陰後。夢在西州夕照間。芳徑印來羅襪軟。落英襯去舞茵閒。板橋香豔消沉盡。空對蘼蕪憶玉顏。繡徧山程與水涯。黃宜鶺鴒子翠宜鴉。南朝烟雨重三節。北里鶯花第五家。小院空階眠蛺蝶。荒陵古道問蝦蟆。銷魂最是橫塘曲。回首春風冷琵琶。家在江南水一方。空憐小謝賦池塘。採將芳杜情誰寄。佩到柔蘅影亦香。客路有人愁細雨。天涯何處不斜陽。玉關消息知何似。綠徧前朝舊戰場。

小遊仙詩

雲滿層城花滿樓。碧鸞唳徧萬峯秋。蓬萊清淺銀河小。又作人間一度游。琴譜新調綠玉徽。珍珠簾外萬花飛。太清夜召彈神雪。敕賜璇宮一品衣。銀榜高懸玉篆紋。樓臺一半濕春雲。碧桃花下紅蝴蝶。原是麻姑五色裙。花放扶桑倚紫屏。西流海水入空青。仙鬟手結珍珠佩。摘得瑤光一串星。題徧雲綃壓衆仙。微吟聲出蔚藍天。星娥擊節黃姑笑。讀我新詩第幾篇。

玲瓏屈戌鑲瓊屏。親挽靈虬送王妃。閒向碧闌干外立。白雲如海濕秋衣。
霓裳玉佩意徘徊。閒看銀蟾臥綠苔。三萬六千明月戶。何人低唱紫雲迴。
芙蓉城闕萬花攢。玉女名牋小錄看。管領春風花絕代。曼卿值得作仙官。
曾向紅雲侍玉皇。羽衣長染御爐香。海棠萬樹愁春雨。夜夜通明問綠章。
圓月微銷五色霞。曉寒曾訪玉清家。夢回忘卻新詩句。祇記瓊樓倚桂花。

月夜海上觀潮

雙門夜靜風蕭蕭。日潮不足觀夜潮。明月照海海水白。碧雲捲盡青天高。
漏聲初起潮未起。夜色沉沉越山紫。萬里滄溟靜不波。一片空明接天水。
須臾戰鼓轟如雷。潮聲已逐風聲來。玻璃世界忽破碎。水底湧出金銀臺。
百道銀河向空立。是水是月迴難別。娥輪照影魚龍飛。雪浪濺空星斗濕。
靈胥白馬驂翱翔。頃刻應已臨錢塘。寒潮湧月月不去。依然雲淨天青蒼。
歸來小臥劇清曠。花影如潮滿秋帳。鄉夢驚回夜不眠。尚有餘聲來枕上。

相思

相思爭似不相思。藥苦飴甘祇自知。織到藕絲難作匹。拋殘鈿局本無期。
雲同縹緲花同瘦。蠶太纏綿蝶太癡。冷雨寒風眠不得。挑燈自寫斷腸詩。

補恨誰翻碧落緣。此身應住四禪天。犀株膽小春如夢。鸞鏡塵封去若仙。
讀書依然花絕代。檢方何處藥

延年傷心最是登樓日。長簾空牀一黯然。
脂盞斂翹感舊盟。夢雲難得是非明。十行箏柱留金雁。一角屏山瘦綠鸚。池上絮飛清有影。簾前花落靜無聲。閒房月色空階雨。心字香銷抵隔生。
舊事淒涼倚醉聽。碧城曲曲怕重經。屢逢殘月如新月。數徧張星又角星。紫鳳已隨雲葉杳。烏龍低唱水花腥。仙家應亦愁良夜。風定微聞九子鈴。

山塘晚泊

綠水縹微靨。青山澹暮煙。秋心與離思。都在畫橋邊。燈影不離水。簫聲何處船。高樓好明月。又向酒人圓。

劍池

寶劍飛騰後。虹光不可韜。神龍終變化。池水亦波濤。山落空青瘦。星涵太白高。腰間鹿盧在。思淬鸞鵲膏。

真孃墓

香塚蘼蕪綠。春陰暗雨絲。羅裙都化蝶。猶上合歡枝。
西陵油壁車。南國紅心草。儂亦有鄉親。錢塘蘇小小。

雨中望惠山

十載江南夢。空思第二泉。山靈況招我。倚棹水雲邊。寒雁下江渚。濛濛雨接天。瓦瓶且沽酒。相對飽秋烟。

玉鈎斜

渺渺雷塘路。迢迢邗水涯。誰憐二分月。曾照六宮花。憶昔迷樓築。還聞寶帳奢。修眉濃染黛。纖臂豔封紗。水調催箏笛。新聲寫琵琶。有情眸損鳳。無賴髻添鴉。綠綺愁仙嬪。紅梁怨麗華。雨雲前事杳。金粉斷魂賒。春夢銷銅輦。秋墳葬錦沙。重來塵一片。不辨徑三叉。楊柳空留影。蘼蕪漸吐芽。雞臺殘址在。螢苑廢垣遮。衰草棲寒蝶。荒原竄亂鴉。化爲黃土屑。散作碧天霞。瓜步沉兵氣。蕪城失帝家。夜烏聽不得。啼煞玉鈎斜。

紅橋秋泛

五雲樓閣曲闌斜。影落湖波浸斷霞。一片相思遠難寄。自臨秋水弄蘋花。隄柳飛花慘不春。宮腰殿腳總成塵。玉鈎斜畔秋蕭瑟。冷雨寒烟弔美人。面面垂楊面面風。畫橋西北畫樓東。夕陽祇在闌干外。一半芙蓉水上紅。花外秋陰閣暮雲。當筵誰唱藕絲裙。迴船一路紅燈影。抵得揚州月二分。

二十四橋篇

畫橋宛轉眠晴虹。十二曲闌重復重。微波倒影蕩圓月。銀河瀉空月華白。鴛鴦夢醒紅藕開。美人如花踏月來。蛟蜺魂銷綠楊暮。美人如雲隨月去。玉顏寂寞埋春蕪。飛絮飛花古城路。夜烏啼急歸潮寒。玉簫聲斷羅衣單。殘月仍照紅闌干。

題宮怨圖

風疏銀漢雁聲來。雨黯銅鋪長綠苔。忽捲珠簾花影動。一彎眉月上宮槐。

小秦淮

春山仍染黛。秋水自通潮。一角紅闌月。盈盈按玉簫。
楊柳如腰瘦。芙蓉對臉生。銷魂人絕代。愁煞石頭城。
花外小紅樓。珠簾上玉鈎。南朝風味好。只合住揚州。
繫馬銅街柳。啼鶯繡巷花。春來雙燕子。何處認盧家。

繡女祠

北狩青衣冷。南遷玉輦遙。飄零隋苑樹。嗚咽廣陵潮。丹熟朱顏在。恩深綠髮銷。殘山留一角。祠宇傍虹橋。
天水傷心碧。中原失趙家。夢隨行殿月。淚濕故宮花。神女留孤影。眞妃憶九華。隋堤如汴水。遺恨玉鈎斜。
不盡繁華夢。東京事總非。蛾眉二分月。仙骨五銖衣。劫懺紅羊盡。魂銷白雁飛。金鑲留絕塞。鳳幃幾曾歸。
一嘯吳天碧。雲中倚紫鸞。經聲遲玉磬。松影冷瑤壇。秋葉深宮斷。春櫻寢廟殘。蕃釐眞觀近。半壁祝平安。
月夜對山樓聽彈琵琶歌

對山樓中華月明。對山樓外寒潮生。珠燈照影萬籟寂。檀槽一劃飛秋聲。鷓絃初撥響春雨。宛轉流鶯隔
花語。畫簾風細銀蒜沉。綠牕呢呢小兒女。忽如孤雁雲中來。思婦顛顛征人哀。河冰碎裂馬蹄滑。雪花亂
落軒轅臺。銀甲旋揮調重變。將軍未罷頭鵝譙。一片金戈鐵馬聲。陰山夜半驚傳箭。斜抹輕挑聲轉徐。餘
音一滴一流珠。水仙如花善窈窕。青鸞一去覓寰孤。絕代風流寄腰鼓。狀元舊作青山主。此地從來宜此

聲。一曲涼州萬花舞。何李詩壇幾廢興。百年重向醉中聽。琵琶聲斷悲歌起。月上闌干第幾層。

康山草堂題壁

山石俯清池。翠影浸秋黛。遊魚觸藕絲。一片蘋花碎。
層臺憑曲闌。風急秋衫冷。濛濛雲樹外。空江辨帆影。
空階紅葉積。古壁蒼苔繡。籬角見秋花。花影如人瘦。
雙井秋水深。不聞轆轤響。隔院梧桐葉。忽墮銀牀上。
樹影下西廊。夕陽紅半閣。小院不逢人。空階松子落。
西風斷雁聲。落葉迴風舞。人坐夕陽亭。空翠下如雨。

流雲楊歌

太古老樹根如鐵。龍蟠蛟伏潛虬掣。仙人一臥三百年。秋蟾夜嘯寒山雪。廣寒讌罷銀潢秋。白雲如水當空流。二十四橋露華冷。天風吹墮康山頭。晚潮催我征帆卸。我到康山正秋夜。醉來一榻枕流雲。雲中彷彿虹梁跨。月鈎低捲珠簾斜。瑤臺四面開瓊花。黃姑玉女笑相見。夢遊直到仙人家。仙之人兮酌我酒。手挹天漿斟北斗。鵝笙低按紫雲迴。花下仙娥小垂手。碧海歷歷秋星光。微風欲起飄霓裳。雌皇小鳳侍無數。碧城十二驂翱翔。芙蓉雙花瘦雲葉。夢裏詩魂作胡蝶。碧雞唱曉扶桑枝。雲染秋衣佩珠濕。

題長離閣遺集

春水蘭陵弔玉臺。曇花香盡肯長開。青鸞雲散紗廚影。白蝶花飛錦字灰。甲帳繡襦寒夜月。丁簾畫檻黯秋苔。昆靈曲後華清曲。唱到蟬絲惜鬼才。

碧海青天信有之。瑤壇慧業託微詞。春泥香冷瓊姬墓。夜燭寒書玉女碑。萬軸靈飛司蠶粉。十重切利住蛾眉。情緣不共秋雲斷。花葉絨題更寄詩。

英才都合讓媼姪。江左何人說尹邢。文錦花殘曾織字。韻紗蟲網舊傳經。芳蘭幽怨招湘女。翠羽徘徊弔洛靈。誰是南朝徐孝穆。驛軒詩序簡齋銘。

爭禁騎省不傷神。盡篋殘縑半食貧。嚼蕊吹花工宛轉。歌離弔夢總酸辛。天憐婉孌先埋玉。我識嫦娥是結隣。惆悵扶風門下士。學書遲拜衛夫人。

第五泉

葉落銀牀積暮煙。雪甌輕泛乳花圓。此來小有留題處。第一江山第五泉。

倚虹園

芙蓉墜露木蘭舟。斜日停橈半晌留。樓外斷霞低蜀阜。門前流水接邗溝。烏驚落葉頻移樹。人倚紅闌易感秋。應是漁洋賦詩地。畫橋衰柳不勝愁。

卽目

美人採蘋花。垂手明于玉。一鷺破煙飛。羅裙碎秋淥。

唐玉真公主楷書靈飛經真蹟

瓊宮上法眞靈譜。簪花小字嬌眉嫵。蘭闌芸香護七籤。芳名尙署唐公主。唐家公主數何人。第一蛾眉是玉眞。帝子秋風臨北渚。天孫銀漢隔西津。生來愛說瑤清事。龍樓不羨皇家貴。金輪禮佛玉環仙。本朝家法原如此。別起琳房間玉墀。豪奢不學定昆池。青山遠築王姬館。碧落新開玉女祠。飛華裙褶瀟湘水。鄴侯仙骨曾呼弟。瑤草琪花沁水田。瓊樓玉宇蘭陵邸。小步蓮鞦躡鳳翎。夢中法曲譜嬰靈。瑤壇畫靜沉明磬。誦得靈飛一卷經。靈飛六甲繙篇目。朱符服竟聞微祝。蘭修縹緲更靈珠。太元女伴都如玉。美女登臺六法工。琉璃硯匣墨香濃。烏絲旖旎眞珠密。惜少蘭金小印紅。細字蠶眠親檢校。方諸臺上誰同調。展卷更番寫小名。粲然玉齒低鬟笑。君不見文成嫁後又金城。幾輩和親絕域行。珠闕花宮青海上。神龍舊誓續前盟。又不見同時七主多驕橫。紛紛開府干朝政。墨勅斜封安樂驕。翠華頻莅長甯盛。並蒂芙蓉各自妍。一時同志有金仙。星冠羽帔辭宮禁。尙憶先朝太極年。上清進號元都籙。玉顏小妹長蛾綠。本師同拜史鴻臚。壻才那得張光祿。此卷當年奉勅書。黃庭楷法間歐虞。綠翹侍女親磨墨。花謝東風二月初。彷彿昭陽內人筆。晉陽飛白同閒逸。心經零落佛祠荒。開元全盛無多日。押尾雙行點畫精。持盈款識認分明。清容鑒古曾無識。鑿空惟誇鍾紹京。蘭亭蕪紙同珍重。夜光抵鵲空驚竦。收藏海內更何人。海昌陳興華亭董。玉版香濃蠹不消。金星麝月總無聊。碧城十二闌干曲。閒煞秦臺月夜簫。

美人抱素琴。遲我秋江涯。秋江作明鏡。照見青天霞。玉指一再彈。寒雁低平沙。湛湛江水深。開落芙蓉花。重登蜀岡卽以留別

夜雨餞朝爽。天地洗秋色。朔風吹羣雁。劃破吳天碧。登高覽澄霽。元氣自鬱結。南朝隋帝樓。西漢吳王宅。銅山與玉鈎。踏作煙花陌。昨日登眺地。今日已陳迹。人生無百年。慨茲遠行客。落葉別江南。青山望淮北。惟有海門潮。奔騰自朝夕。明發挂征帆。白雲留不得。

露筋祠

四百南朝寺。鐘聲半夕陽。從來勵清節。終古此祠堂。修竹湘娥怨。蓮花玉女粧。何須矜博物。指點鹿筋梁。

甃社湖

三十六陂水。蒼茫遠接天。相看黃葉路。都在白雲邊。雁背落秋露。魚帆收古烟。江南二分月。長共夜珠圓。

碧城僊館詩鈔卷二

月夜謁岱廟

嘉慶歲戊午。元冥方司冬。時惟十月望。北遊經山東。暮抵泰安郡。蒼翠瞻岱宗。明發不及登。景仰心蟲蟲。同行爲我言。借我趨靈宮。初至遙參亭。佳氣深鬱蔥。蒼屏橫夜碧。華闕祥煙籠。金鋪啓朱門。納陛深重重。觚稜上棲爵。焚燎迴眠虹。飾璫燦玉璧。列錢銜金鈿。仰茲綽楔壯。心懾神靈鍾。五嶽此最尊。餘者惟率從。禮秩擬百王。豈惟視三公。劍佩肅皇儀。袞冕瞻帝容。廟祝導我前。一杵鏗華鐘。生平禱已久。再拜昭虔恭。秉燭照畫壁。金碧明雙瞳。青旄揚縹綵。紫軼和玲瓏。金神奉華蓋。玉女調笙鏞。中權列繡鷄。前驅走靈騶。千乘復萬騎。蘭綺交戈鏜。冠笏朝百靈。偃僂立鞠躬。彷彿帝時巡。鹵簿陳肅雍。陰廊繪百神。武怒傑且雄。亦有美如玉。慈者顏和融。地獄寫變相。鬼物填青紅。想見吳曹輩。恍惚追靈蹤。虛廷盛漢柏。根柯如青銅。虬枝蟠風雷。不數秦皇松。別牖森唐槐。皴膚復裂胸。垂蔭大逾畝。花時清陰濃。巨石色積鐵。植立如撐笏。何代所建置。攷古疇能窮。復有數奇石。浮海乘天風。扶桑上朝日。曾挂將軍弓。累朝重柴望。屹立豐碑豐。最鳳昂首負。大書光熊熊。其旁羅石碣。光澤瑩磨礪。頗有貴人詩。字畫雕鐫工。更轉右闔入。拾級登崇墉。巖巖氣象尊。面對日觀峯。徂徠及新甫。拱立若附庸。一氣走溟渤。何況東西蒙。餘峯不知名。一一青芙蓉。是夕月正望。圓壁升天中。倒影射光彩。碧瓦金液衝。直上挂北斗。七星當虛空。紫氣騰鬱律。上燭蒼精龍。

西南指檣槍。兵氣纏華嵩。軍書走荆襄。羽檄交河潼。維嶽鎮齊魯。德大功尤崇。況以膚寸雲。爲霖慰三農。更望洗兵雨。一銷秦楚烽。天子嗣寶位。祭告精誠通。青圭禮東方。典視璧琥琮。御香肅明禋。上與唐虞同。一家盛禪代。海寓醇化醲。父老正望幸。計日應東封。願上相如文。金泥麗高穹。

紀夢

繡簾不捲護風稜。刀尺聲停小院燈。醉倚梅花弄疏影。滿庭寒月一池冰。

夢中吹簫

一曲參差楚調哀。三生幽怨託徘徊。江寒赤壁蛟猶舞。春去朱樓鳳不來。星影連天低碧樹。月華如雪滿瑤臺。漢宮爭誦王褒賦。金馬何人識異才。

曉霜

乍覺征裘薄。霜華滿客程。寒隨雁聲下。圖逐馬蹄生。銷待初陽見。痕如澹月明。沉吟板橋句。詩境讓飛卿。

燕昭王求仙臺遺址

碣石宮荒蔓草煙。昭王當日此求仙。心殷駿馬高賢外。事在秦皇漢武前。易水風寒秋瑟瑟。滄波月落夜娟娟。蓬萊玉女應無樣。問到人間一惘然。

落花

賸有閒情欲問禱。乘鸞人去竟如仙。但隨流水終歸海。願化香雲早上天。峽蜨重來春是夢。蘼蕪老盡玉

成煙原知薄命留難久。作意開時已惘然。
最難拋擲最無聊。一賦閒情抵大招。芳徑春殘飛作雪。畫簾風細下如潮。鏡中小影描難似。衣上餘香浣不消。四壁銀燈半庭月。那堪坐憶可憐宵。
鏡中飄瞥認前身。瘦卻闌干一段春。領略太疏原我懶。買栽無地爲家貧。空憐紅雨唵詞客。何處青山葬美人。重過芳園倍惆悵。畫樓零落網絲塵。
飄落琴絃靜有聲。閒房尙許捲簾迎。濕經細雨真無那。舞學迴風尙有情。數到華年悲小劫。銷完豔福抵三生。拚將一枕遊仙夢。訪爾香魂到碧城。

鐵簪

梅根飛出仙雲黑。不鑄鐵簫鑄鐵簪。元冰一握朱脣寒。青天吹作芙蓉色。螺紋百結螺花鋪。秋星歷歷排明珠。昆吾夜斷瘦蛟脊。誰與作者來南圖。簪上我聞中郎舊截柯。亭竹寧王醉弄唐宮玉。秦庫昭華不可尋。房家玳瑁今誰屬。尺八何如鐵鑄成。水仙夜舞雌鳳鳴。江城楊柳不堪折。倚樓愁聽關山聲。草堂夜雨開金粟。淚痕洗盡湘江綠。鐵厓曾賦冶師行。玉山誰奏花遊曲。八月秋風下洞庭。魚龍夜伏暮山青。鐵心譜出梅花弄。吹與羣仙月下聽。

香車

繡幃芙蓉飾。華軒翡翠裝。畫輪扶宛轉。寶馬綰昂藏。金鈿嵌原麗。銅釘約最良。梁輶覆氈毼。轅木壓檳榔。

玳瑁千金輜。茱萸百寶箱。寬真容膝屋。穩比合歡牀。屈戍雙頭扣。流蘇四角颺。六街平若水。一路爛生光。雲每東西障。花枝左右望。金盃留紺唾。銀葉奠甜香。蘭幙春雲熱。桃笙夏簟涼。雷聲喧夾岸。鏡影寫中央。搖漾鞭絲活。清圓鐸語琅。見從西第出。知是大家裝。緩緩迴華轂。輝輝麗紫韁。雙鬢認蛾綠。半面露鴉黃。坐合蛛文履。慵應憶隱囊。騎奴驕玉勒。侍女豔明璫。爭道塵沙起。聯鑣笑語忙。行來碾芳草。停處傍垂楊。禮佛琳宮畔。遊仙玉道傍。不須青犢駕。儼似白鸞翔。燈夕交如織。花朝走欲狂。西泠油壁在。舊夢那能忘。

宮人斜

土花暈碧苔。花紫白楊慘。澹悲風裏。幾年塔井葬娟嬋。一片香魂呼不起。陵谷遷移怨未銷。居人指點說前期。六宮銅輦埋長恨。一代紅顏賦大招。憶從丹詔選良家。御筆親封繫臂紗。百子門前人似玉。九龍池畔影如花。花嬌玉豔啼悽咽。紅混壺冰成訣絕。方期麗色重門楣。豈知薄命銷顏色。東望承乾西翊坤。玉顏多少總承恩。離宮清暑冰紈豔。暖閣焚香翠被溫。儘有容華矜絕代。瓊樹芳姿絳仙黛。無分黃金買畫師。牙牌甘列宮鴉隊。分隸中宮與兩宮。年年真老禁花紅。辰牌慣驗銅壺漏。甲帳頻聽玉殿鐘。弓影娉婷烏帽側。香案前頭曾侍直。玉滴寒研銅雀冰。紫羅暖裏香麝筆。君王好道慕神丹。宰相青詞午夜看。爲像天神衣繡甲。更隨玉女禮瑤壇。英華別殿番經蠹。連環錫振凌波步。一炷胡香禮九蓮。黃花開落菩提樹。奉御深宮幾度忙。雞缸春酒鴨爐香。玉芝門啓花如雪。金海橋迴月似霜。月夜花晨常供奉。西苑南臺舊陪從。烟火誰從貂帳看。雨雲空向蠶宮夢。夢裏春遊樂事多。西宮春暖正笙歌。鐘聲抵死催人醒。斜倚熏

籠喚奈何。內家更有提鈴罰。羅襪背寒。玉階滑。太平聲繞苑牆行。五更風雨三更月。亦有當年選侍人。翠
鈿珠樹受恩身。金銀不免蛾眉妬。花落空房。有淚痕。顛顛芳華易銷歇。玉魚露冷春雲熱。一樣深宮奉至
尊。飛花墮溷誰憐惜。病不禁秋損玉肌。香消古剌斷魂飛。長庚門啓宮車出。無復珠簾看水嬉。咒棒犀釘
易衰朽。玉匣珠襦復何有。年年寒食泣東風。一杯來酌中官酒。春來宿草長紅心。玉瘞花蕚不可尋。悽絕
詞人語。嗚咽長門更比墓門深。明徐繁筆宮人斜句黃土如雲築邱壘。一生未得君王寵。爭及霜眉御榻貓。山陰特
起虬龍冢。塔輒零落夕陽騰。蕭寺荒寒冷佛燈。憑弔玉鈎還悵望。昌平風雨十三陵。

紅闌

紅闌四面碧陰斜。酒後閒情入斷霞。小院風微人不見。滿身香雨落槐花。

摺扇

梵字銀絲嵌。冰紋碧鈿裝。疊疑裙摺縷。舒似錦帆張。筠擘湘娥淚。笙調月姊簧。芳規傳海國。巧樣擅餘杭。
雁翅排來密。犀釘約最良。製倣蕉葉潤。價並百團昂。佛國金經紙。仙人綠玉章。生綃工貼翠。豔色奪流黃。
入貢芙蓉闕。揮毫芍藥堂。流蘇分縷綵。玉墜繫琳琅。翰墨書仙債。烟雲畫院忙。丹青摹北宋。香雪仿南唐。
可代紅牙拍。堪爲玉尺量。春風出羅袖。半月舞霓裳。我有新紈扇。曾藏紫錦囊。美人貽雜佩。豔曲寫明璫。
障面羞眉黛。支頤染汗香。夢回時傍枕。裝曉代招涼。瓊樹花雙幅。珍珠字幾行。聚頭徵吉語。纖手稱輕颺。
簾影深深院。苔陰曲曲廊。風前揮蚨蜋。水上逐鴛鴦。秦女乘鸞去。班姬啓匣藏。傷心粉痕在。怕檢縷金箱。

讀吳澹川關中草

橐筆秦川賦壯遊。青天直上古雍州。手攀神嶽三花樹。足濯黃河萬里流。立馬關門開曉日。題襟幕府譙高秋。咸陽自古稱形勝。十萬旌竿倚戍樓。

蒼茫弔古獨登臺。落日平原四面開。東闕蒼龍蕭相字。西都金馬賈生才。苔荒古殿耕殘瓦。水落昆池浣劫灰。六輔三原皆寂寞。河山如此劇堪哀。

建章宮樹接甘泉。平視終南俯渭川。別館明星祠玉女。高臺鉛淚下銅仙。春花杜曲兼章曲。古月秦年更漢年。繡礎無存殘碣少。青苔蔓草總生煙。

路入驪山御道長。殘軀猶認古宮牆。遊仙人去唐昌觀。飲鹿槽空虢國莊。碧草春埋雙鳳輦。蓮花秋冷九龍湯。惟餘繡嶺還依舊。一杵鐘聲動夕陽。

五陵風景舊豪華。走馬章臺大道斜。俠客三更灞陵雪。才人二月曲江花。橫鞭莫問崔盧宅。挾彈誰尋李趙家。賸有城南酒壇在。秋風黃葉聽琵琶。

百首新詩馬上成。高秋橫篴作邊聲。芙蓉小字題仙館。楊柳河橋紀客程。東閣琴尊空四座。南樓風月抵三生。尙書已死賓朋散。迴首秦川未洗兵。

送金手山旋南

風雨鳳城秋。君行不可留。蘆溝萬楊柳。吹雪滿船頭。余亦思歸去。江南有畫樓。客中先送別。望遠不勝愁。

七夕

齊啓紅牕望碧霄。祇嫌天上路迢迢。憐他靈鵲真辛苦。擬喚長虹作彩橋。
銀燭光中繡帳開。碧天雲影亦徘徊。癡心欲向嫦娥問。看渡雙星第幾回。
曾游滄海泛靈槎。認得璇璣傍水涯。乞取銀河洗兵馬。征人十萬早還家。
涼雨瀟瀟暗畫羅。今宵靈匹會如何。年年離別應經慣。底事依然灑淚多。
終年一水隔盈盈。難把金梭織別情。世上女兒休更乞。誤人從古是聰明。
一別青鸞盼後期。紅樓枉自驗蛛絲。幾能償滿天錢債。免得年年怨別離。

薛素素挾彈圖

鳳釵壓髻花圍領。單衫結束纖腰整。省識前朝薛潤娘。生綃誰寫娉婷影。構李城邊路狹斜。傾脂河畔美
人家。枇杷晝靜銅銀掩。春水鴛鴦泛落花。十能並擅真無敵。吹竹彈絲並奇絕。就中挾彈技尤精。僚丸羿
射無顏色。翠袖微揜雪腕擎。柘弓如月彈如星。斜飛春雨明珠影。碎裂秋冰斷竹聲。玉鞭繡鐙青絲轡。五
陵俠客容聯騎。走馬歸來酒半酣。每將小婢鴉黃試。玉帳牙旗上將壇。貂蟬恩寵李征蠻。特從別院開金
屋。最愛專房對玉顏。桃花顏色芙蓉面。畫圖海內流傳徧。南方宣慰西陽彭。揮盡千金慳一見。東風花謝
海棠紅。非雨非雲舊夢空。羊氏舞人留靜婉。石家房老說翺風。凡心懺盡皈依佛。半偈蓮花摹水月。小字
金函一卷經。猶是尙書少年筆。鍼神繡綫校書牋。瓊樹風流望若仙。少日豔情憐我晚。生平絕技問誰傳。

黃華小巷春如埽。南朝金粉於今少。畫眉斑管況工詩。烏絲曾寫南游草。我願黃金鑄彈丸。眼前羅綺似君難。燒燈爲續江都句。題榜雲鬢著意看。

燕姬行

燕京女兒美如玉。凝脂一片嬌新浴。燕京女兒顏如花。斷紅雙頰勻朝霞。如花如玉豔傾國。黛染蛾眉檀暈的。胭脂山下是兒家。絕代芳華好顏色。雲鬢新樣內家妝。翠鳳雙花作兩行。琳瑯寶珥垂肩重。綵繡宮袍拂地長。便房曲折風簾護。響屐空廊宜細步。對鏡親將芍藥簪。掃牀時有檳榔吐。螭蟠領滑膩芳蘭雪。白吳綾護曉寒。臂上睡痕珠絡索。口中花氣玉連環。桃花顏色芙蓉面。烏鞞翠帽尤輕便。矮嬾真宜馬上看。娉婷更憶車中見。馬上車中影最嬌。祇應一顧一魂銷。生憐酒畔迴青眼。慣聽花前奏綠腰。五陵年少輕離別。闌干玉筍當筵濕。鞞策聲中憶遠人。茫茫青海秋飛雪。黃羊行炙玉盤珍。手點駝酥塞上春。試譜延年新樂府。北方從古出佳人。

秋夜琴聲曲

銀河夜靜聲珊珊。流雲洗出白玉盤。秋風無賴吹羅紈。冰絃生澀凝夜寒。美人纖手一再彈。瀟湘水急生微湍。秋心恍惚來無端。仙之人兮乘青鸞。或搴芙蓉紉幽蘭。金鵝花樹搖團團。紅冰濕露衣裳單。桐陰漸轉金井欄。青天碧海生微歎。參橫斗轉夜向闌。老烏啼上青琅玕。

旅店和壁間湘江女史詩

盧溝一度抵重關。此後行程祗等閒。詩帶秋聲纔耐聽。愁如春草未容刪。晨征慣誤荒雞早。歸夢應先旅雁還。惆悵珍珠數行字。湘江明月憶紅顏。

附原作

寒生客館掩重關。度盡深宵事事閒。報喜燈花開易落。鐫愁詩草蔓難刪。半牕月影鄉心起。一枕雞聲旅夢還。車馬漸紛人又起。怕臨青鏡照塵顏。

新月

新月似蛾眉。娟娟寫素秋。流光最清淺。照見旅人愁。明鏡纔開匣。琉簾恰上鉤。歸期定知未。和影話高樓。

往平弔馬周

新豐獨酌感閒身。讜論千言氣獨伸。賴有將軍能薦士。當年宰相是何人。

東阿弔陳思王

弔古思王子。人傳八斗才。文章鸞有翮。身世鴛爲媒。恩重悲三徙。心孤寫七哀。銅臺空作賦。羅綺半飛灰。鄴下人文盛。應劉託古歡。芙蓉公子怨。共豆弟兄難。江海憐鰥鮒。芬芳惜桂蘭。西園舊明月。流影至今寒。無窮家國事。託興洛川神。解珮誠先達。凌波意待伸。微詞同宋玉。知己是靈均。金枕原無夢。何勞賦感甄。忠義三良感。才名七子尊。死生期報國。車馬憶歸藩。濟水經荒郭。魚山對墓門。無因問遺族。惆悵舊王孫。

魚山神女曲

青山隔烟澹眉嫵。幽澗潺潺學人語。叢鈴碎珮不成聲。白雲如絲織秋雨。澄潭水碧花離離。陳王墓前春草稀。軟風吹波皺空碧。靈香夜染芙蓉衣。斷徑無人濕寒翠。白鶴梳翎得仙意。疊嶂高寒敞畫屏。石上青苔古皇字。紅珠滴露滋幽蘭。碧沙瑟瑟非人間。東峯圓月貼寒玉。照見十六雙垂鬢。古洞陰森闕靈鑰。碧海傳書托靈鵲。弦超去後智瓊孤。一聲清梵雲中落。

月夜行黃河隄上

黃河隄上征車行。黃河隄下寒流平。夜色沉沉萬籟寂。蘆花風急秋潮生。明月蒼茫出天頂。雲開照見黃河影。西風獵獵吹客裘。滿地霜華馬蹄冷。如繩秋雁雲中來。忽然墮地鳴聲哀。木葉隨風渡河去。秋心對此空徘徊。此水茫茫東入海。此月悠悠幾千載。閱盡東西南北人。惟有清輝古今在。眼前人物誰雄豪。所思不見心煩勞。河上曉煙作雲起。斜月漸落明星高。

徐州道中懷古

一劍爭秦鹿。英雄起草萊。斬蛇餘大澤。戲馬失高臺。芒碭真人氣。韓彭大將才。重瞳終可惜。泗水有餘哀。

舟中見紅葉

紅葉江南路。寒知昨夜霜。扁舟遲水郭。秋色滿斜陽。雲外山千疊。風前雁幾行。故園知漸近。不復賦懷鄉。

雨中過鴛脰湖

無端篷背響瀟瀟。雪色銀魚正上潮。好景眼前誰寫得。扁舟微雨畫眉橋。

讀上海女史歸佩珊詩稿

絕代青蓮筆。名媛此大家。幽懷清到雪。仙骨豔成花。待月垂銀押。看雲臥碧紗。烏絲三十幅。信手寫薑芽。
春紅照冰雪。讀到燭花銷。小住鄰三島。斯人似六朝。清音泛瑤瑟。佳耦得文簫。我欲題詩去。明珠托海潮。
問花樓畔月。兩大競詞壇。集中與梅痴女史倡和之作甚多翠袖同依竹。芳心各寫蘭。一雙銀屈戌。十二畫闌干。想見聯陰處。寒花坐晚寒。

擁髻

擁髻談深小閣虛。春燈紅淺暈流蘇。不知牕外團圓月。白到梅花第幾株。

春閨

畫眉啼徹曙。紅淚濕春衣。送郎馬蹄去。夢與落花飛。

女兒酒歌

女兒酒如女兒嬌。鵝黃一片春欲消。女兒酒如女兒豔。紅暈燕支波潏灩。越中生女顏如花。越中釀酒濃如霞。嫁衣未裁酒先熟。應識嫁時香更足。酒爲女兒釀。名亦呼女兒。二八芳年作新婦。三五圓月應佳期。雙龍玉瓶瀉春碧。絕似女兒好顏色。鬱金之味蘇合香。更與女兒同芬芳。酒人一見開口笑。如見女兒正年少。花前一飲三百杯。更呼女兒來謝媒。

一枕

一枕高樓夢。迴廊識謝家。涼生臨水竹。月上隔簾花。畫燭催斟酒。垂鬟學鬪茶。門前烏柏樹。白曉怨啼鴉。

春夜

春星斜轉紅樓角。銀葉香消玉漏催。一片天西殘月影。萬花齊上碧紗來。

送遠曲

澹川將之揚州。四香、蔣山、將旋吳門、作此送之。

雨絲纖水湖影平。落花無語各送行。燕子初來客初去。峭帆目斷江南樹。送君去。思君來。陰廊三日生莓苔。莓苔生。衆芳歇。長相思。夢飄瞥。蘇臺草。揚州月。

雨中牡丹

綠暗雙龍鏡。紅銷百寶闌。天香憐夜雨。國色怨春寒。清淚啼金粉。愁心寄玉盤。相思眠不穩。自起翦燈看。

阿禮曲

東寺花幢梵聲起。馬蹄逸矣平章死。子秋遺恨泣韶顏。一片清冷橋下水。段家九葉擅雄才。親爲梁王百戰來。已見紅軍歸蜀道。俄聞玉女降秦臺。秦臺明月夜當午。燭暗雙花聞笑語。蒼山嵐暖鬱朝雲。洱海波春蒸暮雨。雨雲暮暮復朝朝。翠被濃香夢不消。甲帳健兒橫鐵篋。丁簾侍女按瑤簫。甲帳丁簾行樂地。魚腹有人傳錦字。鴛鴦獨宿亦無慆。屏帷春雨悲捐棄。七星關外認歸程。舊侶難忘故劍情。孤坐肉屏聽鐵立。果然小別抵三生。碧雞金馬無傳箭。重來祇爲新婚戀。方幸蛾眉百歲齊。誰知雀膽中宵變。願共雙飛

返故林。夜深苦口說丁寧。可憐兒女更番勸。爭奈英雄不肯聽。來朝變。驚魂碎。黃泉雖誓身難代。佛塔
烟中哭鬼雄。蟻磯心事真無奈。雲片波濤弔影孤。雁門夢斷泣嗚嗚。從臣更惜楊淵海。靈草難尋押不盧。
西師重襲仍難制。呼救空勞走書幣。虎子難堪此日言。狙公應悔當年計。已卜天心眷建康。眼看走死笑
梁王。菜坪華岫知何處。春草殘基弔夕陽。玉案山平險難控。花暗銀稜亦如夢。南征望重潁川侯。不容故
事依唐宋。祇有僧奴志不移。復仇心事託題詩。至今金齒江山外。尚有烏蠻說繡旗。

送張子白大令之官甘州

臯蘭山畔黃雲流。雲中白日照涼州。短衣躍馬此間去。落花吹滿西南樓。張君張君好懷抱。十載浪遊真
草草。男兒作達萬里輕。才人落拓一官小。江南四月芳草多。一聲鐵篴吹邊歌。黃河西去玉關近。美人消
息今如何。贈君詩。酌君酒。人生聚散夫何有。洗兵雨過秦隴平。送君折盡河橋柳。紅蘭畫閣長相思。迴文
夜織流黃機。燕支會寄好顏色。木葉關山秋雁飛。

夏日雜詩

迴廊低抱曲池圓。一縷微生水際煙。落月輕黃清露碧。藕花香動晚涼天。
桐影疏疏竹影遙。便教不雨亦瀟瀟。夢回忽訝月痕綠。牕外一叢新種蕉。
水牕低傍畫闌開。枕簟蕭疏玉漏催。一夜雨聲涼到夢。萬荷葉上送秋來。
高臥閒庭送夕曛。誰家玉簫枕邊聞。一彎眉月不知處。半是青天半白雲。

夜風涼透碧羅衣。池上香生暑氣微。知是鴛鴦眠未穩。藕花影動水螢飛。
秋意分明透越羅。蘋花小榭水微波。銀濤萬里天空闊。海上風涼更若何。
機杼睽睽斗邊橫。蜀道頻年未洗兵。絡緯夜啼天似水。月中愁聽擣衣聲。

題王石谷仙掌雲氣畫卷

白雲飛不斷。縹緲最高峯。秋色渺阿處。青山失幾重。瀑橫千尺雪。練亞六朝松。天地洗清曠。歸來行雨龍。

小青曲

情天小劫罡風起。片片飛花紅著水。零膏冷翠盡成煙。美人甘爲傷心死。傷心花命薄於雲。絕世才華絕代人。佛肯慈悲憐錦瑟。仙因綽約惜羅裙。妬婦津頭風又雨。倉庚難療胭脂虎。卹知妾不羨鴛鴦。哮聲猶語知何苦。遠籟哀秋帶雨聽。斷腸一卷牡丹亭。白花紫玉悲前世。絮果蘭因懺此生。花開雪滿湖西路。一杯自酌蘇娘墓。閉門深鎖綠陰牀。知是他年埋骨處。冶服易妝玉樣溫。碧天人遠澹無痕。畫師可有傳神手。寫出亭亭倩女魂。鏡潮紅濕芙蓉醒。檀炷香銷梨汁冷。淒涼自弔畫中人。夕陽一片桃花影。如此蛾眉最可憐。西冷芳草葬嬋娟。姻緣領略人間世。莫乞他生並蒂蓮。

芙蓉曲

芙蓉花開秋水波。芙蓉花落愁奈何。鯉魚風起江水碧。染出芙蓉好顏色。煙中拍拍飛鴛鴦。折花女兒空斷腸。花枝影雙人影獨。回頭羞見鴛鴦宿。

張騫玉印歌

涼州一斛蒲桃紫。鑿空身經三萬里。漢家郎將此奇才。論功西域疇能比。忽見當筵玉一方。白虹騰影爛生光。篆紋細認西京字。更爲開邊說武皇。武皇當日矜威力。詔書繹絡通諸國。將軍頻出令居西。材官疊戍輪臺北。奉使惟君最出羣。艱難萬死立奇勛。丹心夜熱天山雪。壯氣秋凌瀚海雲。稜稜紅沫生芒角。土花蝕字凋寒綠。想見河源占募時。一拳親拭昆侖玉。迹徧河西更海西。流傳小物亦稱奇。星漢定向仙槎挂。月窟會同漢節攜。玉關近接金城地。畿番破虜隨驃騎。索馬先懸毋寡頭。迴軍早斷匈奴臂。遺智何堪學奉春。最憐失計是和親。一聲黃鵠翻新調。我爲籌邊惜此人。桂膏紅奪燕支色。話到奇功倍珍襲。合傳無端並貳帥。銘勳未許齊堂邑。跼促中年感壯遊。摩挲古物弔千秋。漢廷俊傑知多少。祇憶當時博望侯。

題勝朝彤史拾遺記

榆翟輝煌副六珈。團圓寶扇月生華。夢中曾數青蓮瓣。天上虛開玉李花。龍殿曉燈親黍稷。蠶壇春雨問桑麻。勝朝家法傳開國。恩澤先教抑外家。慈孝擔闈起化原。璇題端合署堯門。名山萬歲扶雕輦。令節千秋奉玉尊。內則傳詩宮誡切。外廷議禮諫書繁。東朝數有愴懷事。雨泣珠襦薦寢園。承乾西向翊坤東。彤史流傳記六宮。燈影巧開金匱匣。佩聲長斷玉玲瓏。深宵戲祕鬆盆蟀。密誓書殘鈿合蟲。別有秋衾銅輦夢。紫簫淒咽月明中。

涼到秋風百子池。牙牌小隊解題詩。別開永巷名安樂。新勅仙師號靜慈。芳印綢繆寒蜴臂。玉鈎憔悴葬蛾眉。飛花莫抱長門怨。紅石銀錢一樣悲。

讀明武宗外紀

白龍入夢鏡分明。草草遊畋過一生。塞外旌旗三衛部。禁中礮火四家兵。金璫自領中軍隊。玉敕親加上將名。莫道君王不威武。禡牙當日說南征。星急黃封道路譁。後車隨意選名花。三朝舊典刪宮正。六店微行愛狹邪。齊主無愁原有曲。漢王重色竟忘家。脫簪玉貌真傾國。一夜盧溝返翠華。宣府爲家樂未休。浮江又見下龍舟。但聞故相儲書進。空有諸臣諫疏留。夫婦行香春禮佛。君臣賭酒夜藏闌。瑤池黃竹星霜換。八駿虛傳穆滿遊。輪臺遺詔亦淒涼。內傳分明記武皇。因果枉勞三世問。繁華肯信六朝荒。天池風雨歸龍馭。夜月笙歌冷豹房。留與千秋作殷鑒。祇今絃索譜詞場。

宣德古刺水歌

春山花氣凝仙露。一甌古水前朝鑄。玉斧何年記劃河。金滄當日勞飛渡。淮甸龍飛海寓平。六師分道命南征。繡旗傳檄梁王走。水落昆池洗甲兵。擺古遙通馬龍甸。從此朱波歸郡縣。九隆不數漢家開。六詔猶傳唐代建。宣慰分符職貢多。名香應不減芬陀。土官鄭重金牌勘。驛路郎當白象駝。六宮晝靜春風暖。玉

織小試金盆浣。一著羅衣香不消。君恩較此知深淺。甲煎龍涎未許誇。明珠結乳玉生華。涼宵閒話還方事。蠻女如雲採百花。定知水亦非凡境。不汲龍潭汲寶井。比著綢繆印較新。玉顏一滴春冰冷。中朝勳戚沐餘芳。恭順家曾有禁方。枕頂溫騰傳世廟。御衣小炷說純皇。翫物精良復何有。哥審梅冶都名手。鴨鼎濃熏篤耨香。雞缸淺酌蒲桃酒。香柏城遙控麗川。威名黔國鎮窮邊。黃封續進洪熙歲。金繪先頒永樂年。五行妙理金生水。赤金爲表黃金裏。鑄成細字辨毫釐。三百年來亦如此。聽雨樓高易斷魂。當時曾否入權門。沉吟天水冰山錄。欲乞名香爲爾熏。瀾滄萬里青蛤戍。香濃還恐薔薇妬。當年載筆問誰家。南都尙憶春橋顧。流落人間歲月徂。深宮舊事夢華胥。此中便似剞仙淚。一代金甌似此無。

碧城僊館詩鈔卷四

湘宮人折花曲

蘭幙掩流蘇。珠牕問了烏。華燈暗。虹膏沉。烟息龍腦。碧殿濕螢多。玉樹啼烏早。銅輦夢回時。月落湘宮曉。宮裏曉粧人。娥娥紅玉春。畫眉螺黛淺。注的麝黃勻。髻重暗遮霧。髻嬌輕掠雲。芳年自珍惜。顧影獨含顰。含顰復含怨。徘徊玉塔畔。迴頭罨紫釵。振袂鏘瑤劍。柔枝頓細腰。高葉窣芳腕。桃鬢立共齊。蘭氣吹相亂。花下語流鶯。紅芳散落英。羅屏飛蛺蝶。玫砌上蜻蜓。斑竹淚空滴。巫山雲不行。守宮還似昔。脉脉不勝情。柳絲分燕尾。弱絮吹還起。嬌細不勝風。歸坐紅牕裏。灼灼合歡枝。艷艷雙連蕊。簪向玉臺前。明鏡如湘水。

湖上遇雨

南峯北峯水雲起。裏湖外湖涼意生。萬荷葉上雨聲至。柔櫓一枝煙際行。水面亂跳萬綠珠。打篷如豆雨脚麤。羅衣太薄禁不得。涼風颯颯吹菰蒲。

雨後泛月

雨雲收盡天空青。峯頭月出湖底明。湖心一亭秋水上。瓊田四面琉璃平。櫓聲如鴈劃寒碧。扁舟疑向空中行。藕花香靜白鳧宿。水風花氣吹泠泠。羣山黯澹若殘畫。惟見寶所一塔天邊撐。誰家短篴蒼遙浦。漁燈影澹沉秋螢。衆星三五不盡識。匹練耿耿銀河橫。碧筒紅露傾酒榼。花觚綠雪開茶鎗。客心悄然萬籟

寂海門隱隱寒潮生。月湖本較雨湖好。況此雨後秋涼輕。瓊樓玉宇渺何處。思驂鸞鶴游瑤京。參橫斗轉月漸落。南屏一杵鏗鐘聲。

范素君水閣塗粧小影

梁園詞客倦遊還。消得閒愁祇玉顏。聞道鏡湖明似鏡。眉痕青寫越中山。梅雨蘇州暗館娃。吳粧新樣暈朝霞。闌干一片燕支水。紅上芙蓉並蒂花。

白蓮

迴文白石塘。亞字紅闌曲。春波澹連空。秋水明於玉。楚楚白荷花。輕風吹素霞。香泥生藕小。碧蓮縫葉遮。瑟瑟瀉珠露。亭亭隱玉沙。仙人縞素裳。隱約昔邪房。艷態矯鬢飾。羞顏紅粉粧。流紋蕩華帳。白壁裁明璫。臨風如欲語。水珮翩翩舞。根成連理枝。蕊簇同心縷。采采獨含愁。嬌嬌出畫樓。銀塘水無際。碧波花亂流。迢遞蓼花渚。浩蕩木蘭舟。秋風吹夢斷。明月滿西州。

畫屏士女

聲聲姑惡夜中哀。千里廬江去不回。一自東南飛孔雀。至今雲影尙徘徊。闌芝輕薄登臺怨趙王。兒家夫婿侍中郎。玉顏婉孌冰心苦。一曲銀箏陌上桑。羅敷夢隔黃河水一涯。明駝十載送還家。沙場百戰橫戈夜。如此英雄卻姓花。木蘭拋殘舊譜委芳塵。金谷香銷草不春。玉篴一聲花萬片。傷心怕說墜樓人。宋稗

湖水盈盈繞石頭。美人打槳蕩輕舟。莫愁兩字空珍重。一片春潮我亦愁。

莫愁

左右花枝最有情。渡頭雙影總盈盈。青溪倘有行三妹。合與桃花署小名。

桃葉桃根

笙鶴謠天自在行。道家粧束亦娉婷。簪花書法遊仙意。手寫靈飛一卷經。

玉真公主

一函唐韻玉題標。紙上香濃總不消。日暮青山同跨虎。求仙祇願作文簫。

吳彩鸞

仙貌如花枉自嬌。雲情入夢亦無聊。青衣不作隨風絮。我欲吳綾繡綠翹。

綠翹

絕代蛾眉此賞音。才人遭際美人心。我詩不願旗亭唱。爲有紅腮細意吟。

雙鬟

綠珠玉笛

血花沁紅土花碧。一聲入破仙雲裂。千秋古玉口脂香。云是當年綠珠簾。雙角山前汲井華。白州原是舊兒家。明珠十斛猶嫌少。房老爭看第一花。天生夙慧真眉嫵。紅閨手製新翻譜。自憐玉指按玲瓏。一片香塵萬花舞。爭奈繁華逝水流。齊奴步障眼前收。美人甘爲將軍死。萬點燕支泣畫樓。此簾應知錦囊護。定教弟子親攜去。天顏一笑六宮愁。何年玉匣歸陵墓。世事升沉有變遷。蘭亭又見出人間。偶逢花發思金谷。聽到燈殘憶玉顏。沉檀薰槽勞珍襲。換來豈但千金直。莫向尊前奏落梅。怕教花墮紅香濕。

可莊題壁

西冷橋畔路。煙水好漁磯。老樹留鴉宿。前山見鶴飛。晚風長簾起。細雨畫船歸。秋氣深紅蓼。微波冷葛衣。

落葉

芙蓉水榭記停橈。沽酒人迷舊板橋。古道日斜隨客騎。滄江風急點寒潮。行來野鹿喧苔磧。聽到哀蟬感玉簫。惆悵蘇娘樓畔路。垂楊如雨夜瀟瀟。

湖船雅集贈蘭箴校書

媼姪意態不凡才。油壁車看卻外來。扶上畫船迴一盼。滿湖雲影盡徘徊。當筵唱煞鬱金裙。風約衣香四座分。怪道昨宵微雨過。雙峯留得美人雲。酒痕容易上雲衣。鷄枕春屏舊夢非。一曲流珠歌小海。四山紅葉作花飛。螺丸細膩寫蛾眉。空谷幽芳未許知。秋水自憐堪照影。芙蓉花下說相思。坐對青山倚畫橈。流波不定聽吹簫。生來愛識團圞字。怕說迴船過斷橋。斜陽無賴送歸鴉。酒後殘粧艷晚霞。絮語丁寧邀過訪。百花池巷是兒家。

奢香曲

羅甸國主宣慰妻。金碯玉砦居水西。四十八部受約束。軍中凜凜瞻繡旗。高皇龍飛起淮甸。萬里來歸先革面。遠道年年貢乘黃。龍駒汗血馳飛電。錦衣玉貌像天人。帳部爭傳娘子軍。洗氏風流今再見。威行諸部息邊塵。馬家旗鼓聞諸國。號令應從築城識。據鞍原抱伏波心。欲開交趾平徵側。措置乖方邊釁挑。竟將裸撻窘嬌嬈。分明驟雨催花碎。不惜驕陽炙雪消。當年若鼓諸蠻起。從此西南多事矣。善全難得有劉娘。走向九重訴天子。看徧宮花萬樹紅。恩深更許拜中宮。南人不反將軍誤。都在君王燭照中。代矢忠誠

心不二頃刻馳書走飛騎。一紙賢於十萬師。片言立召奢香至。綬靖羅夷職固然。君恩難報總如天。願教重關黔東路。免使人歌蜀道難。尺書關外將軍召。虬髯怒植蛾眉笑。東市朝衣壯士悲。南方故壘流人弔。重開赤水接烏蒙。黔蜀從今舊路通。九驛龍場馳四馬。子孫世世守孤忠。繼世仍聞安氏立。從征不復天威懼。會城萬仞築連雲。么麼敢笑氍衫疊。何妨小謫慰夷情。壯志當年枉請纓。豈獨馮藍泣冤獄。汝家慣自壞長城。

送王椒畦還崑山

君是維摩詰。風流見一斑。銜杯送涼月。燒燭畫春山。官閣梅花放。扁舟瘦鶴還。吳雲吹漸遠。憶子玉峯閒。

後湖舫雅集贈鳳徽校書

留照蛾眉月一痕。獨教鸚鵡語黃昏。兒家住處宵纔識。不隔清溪恰對門。峭寒輕襲鸕鶿裘。玳瑁重簾掩畫樓。親叩銅環催早起。芙蓉花下看梳頭。鳳眸一顧最魂銷。三疊霓裳急暮潮。愁煞梧桐搖不定。秦臺明月願吹簫。穀紋照影水生香。白紵紅牙樂未央。一抹青山漸催暮。人閒無賴是斜陽。

小樓

軟語親從月下聽。碧紗黯澹隔疎櫺。小樓已讓他人住。夢斷春山兩點青。

寓感

罡風吹散碧天霞。目斷高樓問謝家。曾送香車歸北燭。空尋仙籙憶東華。洞房親種紅梔子。水榭微吟白藕花。記向簸錢堂下見。春雲一半尙垂鴉。

當年兩小各無猜。乳燕尋簾日幾回。畫閣許窺金作屋。明粧宜稱玉爲臺。長因乞巧筵前見。曾侍簪花會上來。瑣事從頭總堪憶。嬋娟誰似不凡才。

親學唐詩教綠鸚。吳粧溫軟楚腰輕。脩眉澹寫初三月。小字新排第五名。佳節中堂都拜母。花前莊語祇呼兄。屏風會寫朝雲影。其奈聰明畫不成。

中年哀樂感蛾眉。又謝東風第一枝。香冢春泥仙姥宅。桃花寒食女郎祠。月難留影三生夢。錦欲成灰四字詩。欲採白蘋薦秋水。碧雲日暮悵來遲。

縉雲石歌

查伊璜孝廉樸園中石。卽吳六奇自粵東運至者。事詳孝廉所撰樸園記。及鈕琇觚賸。石今在海鹽縣。

停雲不散吳天碧。人指前朝孝廉宅。高臺已盡曲池平。一拳猶賸珠江石。珠江節鉞領樓船。控制東南海。

外天讀到粵觚奇。雪遶才人軼事說當年。當年海內誰奇傑。鐵丐錚錚真似鐵。風塵偶爾識英雄。雲烟過

眼隨飄瞥。閉門祇願老柴荆。入夢梅花識有靈。孝廉有梅花半壁江山分黨局。詔書甘謝小朝廷。宏光南渡

中徵不就。興亡轉眼悲朝暮。偶然五巔遊蹤去。花首臺高蛺蝶飛。此來原爲羅浮樹。小隊郊迎帳部陳。馬前

低首拜逡巡。誰知百戰威名將。卽是當初乞食人。妻孥尙食躬行酒。傾心自訴銜恩久。不慚太白識汾陽。豈但淮陰酬漂母。幕府森嚴擁戟門。園林有石立斜曛。生平最抱襄陽癖。兩字淋漓署縹雲。是時史案消無迹。封章也出將軍力。與盡還歌歸去來。玉筵驪歌留不得。直下西江萬里船。歸來甲第忽巍然。材官鄭重將軍意。十頃還增下澤田。意中一石驚依舊。飛來眞箇同靈鷲。親想殘墨尙依然。天風吹得仙雲縹。別墅西州路不遙。守門無鶴任人敲。一株古樸前朝樹。午睡常分鶴半巢。微波水榭閒留客。譚詩說劍邀前席。花底流杯慣鬥茶。竹閒傳響催行炙。孝廉居樸園中。客至。有所需。輒以竹筒傳聲入廚下。須臾豐饌羅列。皆以大瓢自溪浮至檻下。主客互取之。終席不見一婢僕。見樸園記。四種新翻院本精。哀絲豪竹寄閒情。沉憂尙抱靈均意。矮媠親排十些名。孝廉自莊史案被釋後。肆意笙歌。家伎悉以些名之。楚些柔些尤美。就中蜨粉尤嬌旖。留仙裙褶湘江水。按圖索驥怨東平。綠珠不教樓前死。泣別甘拋舊舞衣。愴懷最是阿叉歸。銷魂欲死尊前意。觀色成空悟後機。酒邊立遣蛾眉散。隨風處處飛花片。祇餘石友老空山。雲根深鎖芙蓉院。蜨粉孝廉家伎。貌美。東平侯強索去。妹阿叉從行。侯妻妬。蜨粉因母之問道。西子湖頭水又波。開堂乃使阿叉歸報。東平侯旋伏法。家亦蕪沒。蜨粉不知所終。孝廉因是散遺聲伎。講學意如何。翦鐙手定門人錄。我惜孤忠沈似蘿。孝廉晚年講學於吳山之黃泥潭。杭郡守爲置几席。沈似瀾見門人小錄。乙酉。死邦溪之灘。晚年無賴。沈似瀾見門人小錄。乙酉。死邦溪之灘。晚年無賴。耽禪悅。紅閨同證無生訣。白業青鐙古佛前。西風吹得頭如雪。夫婦俱耽禪悅。聊尋常燕玉矜豐艷。見慣司空與不豪。順治初。孝廉入都。馮猶龍買左徒身後荒園暮。重來燕子雕梁誤。石數姬爲贈。不稱意。快快歸。不能言也愴神繁。華閱盡鳴鴻度。鳴鴻度。孝廉院本四種之一。袍笏還宜再拜看。萬竅玲瓏瘦骨寒。尙餘老物未摧殘。蔣家樂府風流甚。

蘇小小墓

野田空水碧粼粼。秋草秋瓜黯不春。
油壁車輕尋舊路。錢塘語熟認鄉親。
西陵松柏心空結。東晉鶯花夢作塵。
不信雙桃金井畔。埋香曾此葬佳人。

鴛湖曲

春波漲桃花。春風析楊柳。楊柳舞翩翩。
明璫小垂手。垂手畫橋邊。飛花送客船。
浪花吹作雨。水氣霧成煙。疑煙更疑雨。
綠鬢誰家女。兩槳捷如飛。玉腕輕搖櫓。
香草采汀洲。窈窕上畫樓。闌干紅不斂。
煙雨滿樓頭。樓頭卽湖面。水深看不見。
何處動離情。伯勞與飛燕。水意亦徘徊。
鴛鴦煙際來。波開浴蘋葉。沙淺啄莓苔。
穀紋隱前渡。鴛鴦雨中去。花落不辭枝。
風吹合歡樹。鴛鴦復鴛鴦。雙飛宿畫梁。
數來七十二。兩兩自成行。

學繡里

手汗澀金針。唾花濕紅縷。聞道湖邊學繡人。
猶是溪頭浣紗女。浣紗人去湖水香。
家家都學吳宮粧。春來侍婢買金綫。
羅巾祇繡雙鴛鴦。

傾脂河

春城處處嬌簾櫳。傾脂河畔垂楊濃。
吳宮美人曉粧處。至今春水臙脂紅。
美人去後波瀾瀾。家家水閣臨河起。
梳頭仍傍畫闌干。春來偏是臙脂水。

梅花樓

芳亭眞合畧紅羅。春到庭除長綠莎。香雪滿身人小立。梅花樓畔落花多。

王府基是張士誠故宮遺址

紅軍兢起元運亡。天日不照姑蘇張。平江百戰太尉死。舊時宮殿今荒涼。草澤英雄起屠販。赤手開基無尺寸。李潘何必遜徐常。十八騎當十八萬。南橫江浙據淮。指顧王氣金陵開。當年若使善乘釁。中原逐鹿眞雄哉。龍潭一敗威先懾。坐鎮從容惟目睫。虛心空築景賢樓。用事惟聞王蔡葉。名流亦有吳與陳。暫居幕府不典軍。鍊崖金粟皆走避。何況命世非常人。一朝運去西風起。戰血橫流太湖紫。碧鷄塢畔陣雲低。烏龍嶺上鼓聲死。五砦六寨空自高。赤龍船作赤壁燒。九四意氣信蠟強。不學錢俶師隗囂。齊雲樓閣層雲上。蛾眉蟬髻紛相望。綺羅一炬同報君。卯金殉義尤悲壯。吁嗟乎。古來成敗皆由天。天心未定知誰賢。高皇一劍起淮泗。豈料開基三百年。羣雄擾擾眞憐汝。殘基猶爲悲離黍。月明鬼弔七姬墳。城頭人話三興土。

月夜聽史文香校書度曲

雙影春燈照畫筵。朝霞和雪十分妍。花飛玉屑香脣綻。紅暈脂痕笑靨圓。艷到雲容明似月。吹來蘭氣澹成煙。尊前領取銷魂意。多少閒愁到酒邊。從來國色有光輝。盛鬢豐容似爾稀。明鏡自憐梳子艷。羣芳都讓牡丹肥。重簾不卷春雲駐。四壁無聲白雪飛。一曲遊仙歌未竟。萬花吹滿五銖衣。

果然史鳳最娉婷。鷄枕蓮燈許暫經。檀板一雙敲紫玉。畫樓三五指明星。柔情似水和愁訴。軟語如花倚醉聽。我比馮生更僥倖。流蘇拂面臥春屏。

白月窺人照綺櫺。滿庭春霧澹空濛。心香灰冷銷金鴨。畫燭花寒地玉蟲。跌宕可能同素素。聰明真不讓紅紅。來朝便掛孤帆去。臨別題詩記雪鴻。

桃花塢訪唐子畏墓

鶯鶯燕燕春風酣。風流才子誇江南。墓門荒草冷白石。居人尙說桃花庵。桃花莽畔桃千樹。明霞吹滿橫塘路。胭脂紅雨濕青苔。曾是斯人結廬處。憶昔斯人方盛年。煙花文酒互流連。自將佳句頭銜署。天上閔星地上仙。盛名照耀驚塵俗。海內英流都刮目。傾襟老輩說王吳。同心良友稱文祝。祈夢遙尋九鯉祠。一囊龍劑古險巖。文通彩筆昌黎篆。不許前人獨擅奇。院體丹青精繪事。然脂慣寫嬋娟意。紅閨想見愛才人。濃笑書空作唐字。應俗文章舊有聲。哀然舉首冠羣英。榜頭第一尋常事。不信居然意氣盈。才人放浪終非福。蛾眉太好生謠詠。金銀識氣笑徐經。鬼蜮含沙怨都穆。慷慨悲歌醉幾場。放歸從此托佯狂。關心小說婚姻案。肆意名流翰墨場。多事王門苦羅致。應羨衡山卻書幣。此人原是一狂生。陰謀肯預淮南計。幸免昆岡劫火焚。甘心玩世老吳門。三生禪榻新塵夢。一卷窮途舊淚痕。百丈遊絲牽偃偃。花月聯吟亦豪放。金盞香濃大白浮。玉筵詞工小紅唱。金粉篇曾賦六朝。玉樓空說舊詩豪。雪中高唱蓮花落。草草留題壯氣消。繁華福地吳趨里。琅邪祇合爲情死。酒肆酣眠李謫仙。歌樓持鉢韓夫子。沉醉東風倚碧紗。杜

丹香重麗情奢藥闌東畔親埋玉。卅首新詩哭落花。山塘七里雙橋渡。月下嘗騎白驃去。風雨愁過妬婦津。鶯花獨弔徐娘墓。才人難得美人憐。賃廡傭書閱歲年。閒向蕉牕尋小錄。人閒真有笑姻緣。世傳秋香事。蕉牕雜錄
之。備載 識徵中呂神人巧。去日苦多來日少。不信坡翁遷謫詞。竟成處士龍蛇兆。愁絕星河一雁秋。騎鯨人去冷荒邱。春山埋骨知何地。仍傍臨街舊日樓。一角殘碑土花綠。好事當年聞宋玉。墓前仍種萬桃花。剪茅更結花閒屋。虎阜前番憶問津。題名曾識劍池濱。滿山寒雪松林路。更憶桐橋乞食人。夢墨亭空秋樹擁。魂來不傍要離塚。仙掌孤墳弔柳卿。青溪遺宅悲江總。聞道荒園尙姓唐。感君遭際惜君狂。一尊空酌長洲土。桃樹無言自夕陽。

顧橫波梅花硯爲蔣青荃題

春雨簾櫳玉押垂。烏絲細膩賦紅絲。美人心跡如冰雪。一瓣花題一首詩。璧月飛瓊夢未闌。鏡中國色泥朝寒。曉粧小注金壺墨。半寫修蛾半畫蘭。合歡新樣製香螺。圓暈應教侍女磨。曾見桃花紅一幅。親題小字署橫波。一雙斑管鏤紅牙。飛絮微吟說謝家。何處新詩題最徧。沂湖煙雨聖湖花。額點含章短夢春。愛花真合署花神。一庭香雪濛濛月。憶爾粧臺寫韻人。疎影寒香暈墨痕。春雲同膩玉同溫。桃花顏色梅花骨。硯背摩挲日幾番。六朝金粉此仙才。翠靨綃衣麗鏡臺。羨爾一雙鸚鵡眼。當年飽看玉人來。

名印流傳跡未孤。祇宜架筆伴珊瑚。江南大好收藏地。我憶青溪識小姑。

月夜泊京口登北固山望江

暮江凝不流水。天橫澹白。月上海門樹。照見孤舟客。明星列三五。離離亘圓壁。微聞浮玉鐘。清響破空碧。荒壘空齊梁。人世幾變革。睠言英雄人。風花盡陳迹。浮雲無古今。江流自朝夕。明發早潮生。去去廣陵驛。

雪中過紅橋

玲瓏玉樹冷棲鴉。多少紅樓隔水涯。一路畫簾寒不卷。隔牆香出白梅花。

隋宮遺址

大業垂楊盡。雷塘墓草秋。當年遺勝蹟。此地亦迷樓。海內方殷富。江都樂宴遊。中原集畚鍤。南畝失鉏耰。發難推懷靜。前驅有叔謀。丁男通汴水。甲士達邗溝。王氣開應斷。長江水不流。一椎驚力士。雙壁返留侯。宛轉河傳曲。淒涼水調謳。後宮聯鳳舸。帝子御龍舟。舳艫黃衣挽。鱗鱗錦纜收。翠華移畫艫。金檝蕩輕樓。殿脚花真麗。宮腰柳更柔。離宮開晉苑。別館接秦郵。珠細簾波晃。香濃霧縠浮。荒唐慕秦漢。制度狹殷周。薩水更番戰。長城次第修。紫河增壁壘。青海訪驂騑。鐵杖黃衫沒。珠旗素錦綢。將軍化猿鶴。蕃部笑獼猴。仙枉求臨朔。臺空弔薊邱。重來心更蕩。此後願難酬。珍玩連縣貢。嬋娟繹絡求。矮民進王義。巧匠得何稠。香製檀蘭飲。星馳郡國饒。扶芳進吳郡。嘉實獻瓜洲。織手名花艷。長蛾黛色羞。圍屏銅作鑑。安輦玉爲輈。寶帳酣春夢。橫波散古愁。心惟憐繾綣。臂合印綢繆。國色今生怨。宣華舊恨留。兜鍪念蠶繭。朝暮學蜉蝣。

已竭寰中髓。空悲鏡裏頭。綵牋雙騎勅。銀箭五更籌。玉李春千樹。紅梁醉一甌。瓊花沉洞府。夜月怨箜篌。西苑春空好。東都夢早休。鴉啼春樹老。螢散廢垣幽。金粉埋黃土。麤蕪冷玉鈎。六朝勞結局。惆悵古揚州。

謝太傅故宅

圍棋賭墅興縱橫。千載猶傳太傅名。江左風流推宰相。中年哀樂爲蒼生。老夫自著東山屐。兒輩能驅北伐兵。留得南朝遺宅在。廣陵風雨夜鐘聲。

梅花嶺拜明督師史閣部墓

國步倉皇日。權奸播弄秋。偏安天半壁。作鎮古揚州。閣部真人傑。當年抱壯猷。廬池曾破賊。秦楚共分憂。報國心徒切。勤王志未酬。中興寧擁戴。宵小肆機謀。不得雷姜佐。偏逢馬阮儔。東林先報復。南渡且優遊。四鎮需調劑。三軍敢逗遛。龍蟠惜基業。鳳泗哭松楸。闔外烽纒靖。中宵骨漸收。旌旗移鶴鎮。忠義感瓜洲。士卒同甘苦。炎涼卻篋裘。酒惟下鹽鼓。臥亦著兜鍪。經略開諸屯。艱難仗二劉。孤臣空有淚。天子自無愁。歌舞春燈夜。鶯花小部謳。名閨搜粉黛。宮史印綢繆。久已忘家難。遑能恤國讎。有人工掣肘。無計借前籌。鬪將亡貔虎。殘疆走鹿麇。心傷無指臂。眼見失咽喉。江左朝廷小。中原事業休。戰場埋碧血。燐火照骷髏。正氣星辰在。丹心日月留。前生文信國。盡瘁武鄉侯。義士甘同死。將軍亦斷頭。遺書昭代重。諫疏史臣求。冰雪花千樹。江山土一邱。墓門容再拜。灑淚過邗溝。

大雪泊露筋祠

前日雪中來。今日雪中去。扁舟衝峭寒。回首康山樹。
露筋祠下泊。老樹歸鴉遠。日暮一尊酒。不見淮上山。

琴高池

晚波綠徧涇流尾。琴魚春滿琴溪水。石臺四面桃花開。親見仙人控赤鯉。涓彭術成何所求。此閒汗漫曾來遊。空潭深入取龍子。水底醉臥三千秋。愧我塵容不堪照。碧玉清冷想垂釣。冰絃颯颯飛秋聲。月夜疑聞水仙操。

紫陽觀訪唐女道士邊洞元升仙處

跨鶴騰鸞去若煙。始知蓬島有神仙。士人不嫁崔羅什。寒女真同謝自然。九轉丹成應出世。五銖衣薄易升天。紫雲樓閣都零落。人世於今又幾年。

擬宮中行樂詞

瓊笈繡宮史。瑤池選麗人。漢皇金作屋。秦女羽爲輪。結佩紉梔子。簪花續秘辛。玉顏誰第一。領袖六宮春。鳳扇雲同啓。蛾眉仗對排。春迴胡蝶袖。花簇牡丹鞋。畫冊金泥字。芳名玉篆牌。東皇邀一顧。低首拜瑤階。國色明於玉。宮粧麗似花。一雙眸顧鳳。十五髻垂鴉。石葉熏華薦。金燈照鈿車。內人親記注。淑質出良家。翡翠盤花帽。鴛鴦上繡袍。筆抽斑竹管。箏按紫檀槽。宛轉窺蘭鏡。綢繆印桂膏。春深如意館。不數鄭櫻桃。

守宮槐

尋常溫樹未應同。別有仙槐號守宮。金屋畫長花麗殿。玉階春靜樹玲瓏。芳心宛轉銷蛾絲。小字綢繆暈。桂紅水殿雲房三十六。枝枝深鎖月明中。

誰從禁苑譜羣芳。吹散葳蕤靜有香。玉臂舊痕嫌蜥蜴。銅溝新瓦護鴛鴦。珠簾影下人初困。銀箭聲中夜正長。爭似閨房小兒女。合歡一樹種青棠。

幾番催放可憐宵。不管繁華管寂寥。芳萼半含羞荳蔻。清陰不展學芭蕉。春風玉樹開三殿。夜月瓊枝怨六朝。望幸心情誰得似。吳宮頰與楚宮腰。

不共芳蘭亞鳳簪。絲絲絳縷碧雲深。玉魚夜朗懸金鑰。銅轆秋寒夢繡衾。方鏡冰銷宮女膽。長門花落美人心。無聊又聽紅鸚語。竹葉羊車別院臨。

紀夢

白雲無際畫檐浮。簾捲蛾眉兩點秋。夢裏不知身是客。滿天風雨獨登樓。

登蒼屏樓

天涯難得暫同遊。人海茫茫有此樓。花影冷環三徑靜。雁聲寒壓萬家秋。登臨各有浮沉感。身世誰無俯仰憂。一簾西風二分月。凭闌重憶古揚州。

攀條記向盧溝別。不上斯樓已兩年。黃葉漸疎秋雨後。青山仍繞畫簾前。山中萸菊懷諸弟。江上蒹蘆悵各天。曾與淮南共題壁。相思第一是琅嬛。

歲暮寄懷曼生

記得河樓別。春山正落梅。君仍聽官鼓。我尙滯燕臺。寒夜悲歌苦。鄉心短景催。遙知微雪裏。官閣又花開。
歲晚登樓望。關山半落暉。故人憐遠道。遊子念寒衣。樹老慈烏喚。天空斷雁飛。旅懷如中酒。爭得不思歸。
書至挑燈讀。珍珠字幾行。爲言曾雅集。念我在他鄉。華燭人如玉。紅樓月似霜。遊仙空有約。此願幾生償。
倚劍悲歌起。蒼茫百感侵。鶯花兒女夢。風雨弟兄心。同調期千古。深情抵萬金。春明有佳約。期子共長吟。

哭仲弟壽蘇

四海蒼茫一子由。謝庭花落不禁秋。青山埋骨君長往。白髮驚心我獨愁。風雨寒燈悲客館。江湖春水夢歸舟。深宵起向空庭立。一慟天河接淚流。

少日文章已出羣。可憐薄福是聰明。大招碧落魂難覓。小集金荃著未成。慘澹世緣艱一第。支離病骨耐三庚。傷心尙有名心在。兩字紅牙署再生。

一夕秋聲斷雁行。西風揮淚哭他鄉。三千里外空回首。廿七年來此斷腸。池草綠銷尋夢地。燈花紅冷讀書堂。最憐余季曾刲臂。瘦腊艱難尙髮瘡。弟病方劇。季弟謙谷刲臂和藥以進。而卒不起。痛哉。

此事居然到眼前。求醫禱佛枉經年。孤兒向後皆吾事。遺稿他年定汝傳。入夢祇應同隔世。封書何處達重泉。人生修短真何事。呵壁荒唐欲問天。

浮名驅我復何之。話別牀頭最可悲。握手早防成永訣。安心強自說歸期。天涯迢遞真無奈。弱症纏綿那

可支澹墨欹斜淚。重疊篋中留得贈行詩。
秋老長安木葉疎。羈愁終日感離居。迴腸繞徧啼螿夜。噩夢頻驚雁到初。經歲羈棲遊子恨。萬行血淚老親書。無窮深痛難終寫。蜀國哀絃恐未如。

小除夕同人集蔡浣霞寓齋祭詩

清酒一斗花一枝。長安詩人來祭詩。滿堂華燭啓芳讖。篆煙裊裊縈罍恩。李杜去今已千載。風雲月露常如斯。騷壇管領代有主。妙處豈讓前人爲。我生耽吟久成癖。往往索句忘朝飢。有時吟苦忽不樂。投筆而起心吁噉。旣不能江山花月事遊覽。又不得金戈鐵馬恢雄奇。徒然雕鑄造化劖肝腎。墨花亂洒千烏絲。人言吾筆有神腕。有鬼興酣落筆心焉知。座上詩人我盡識。風流儒雅皆吾師。或如金粟影。莊嚴七寶天人姿。或如萼綠華。五珠輕颺霞綃衣。湘娥宓妃各幽艷。蛇神牛鬼紛盱睢。神之來兮羣靈隨。侍從冠劍森威儀。神之去兮鸞輪馳。鞭鸞駕鳳乘虬螭。再拜酌以黃金卮。一聲爆竹驚鄰兒。

碧城僊館詩鈔卷五

題蘭陵女冠韻香楷書真誥

苔花篆瘦瑤壇石。玉笙風定松陰碧。華陽鶴去已千年。人間留得羣仙籍。蘭繭香深辟蠹魚。千行密字寫珍珠。當年親受靈妃誥。此日新看玉女書。墉臺玉女人間少。長眉淡學青山掃。獨倚春雲看落花。游仙舊路迷蓬島。小調何年下玉京。青天碧海憶三生。五銖褙褕飄長綬。六甲靈飛署小名。夢中舊侶瓊軺迎。蘭因靜向東華證。邢櫻桃去影猶香。郭芍藥來雲不定。不賦香奩謝玉臺。蛾眉前世本仙才。凡心自懺塵緣淺。甘著黃紵八道來。雙修福慧從今始。芙蓉湖上仙菴起。欲題花葉寄瑤池。門前一片鴛鴦水。星辰靜夜叩琳鐘。人在禪天第幾重。四壁琅函羣玉府。三層碧檻蕊珠宮。粲然玉齒香嬰氣。生來愛識神仙字。讀到靈籙墨會篇。瑤清舊事從頭記。尤斂芝經次第鈔。銀鉤楷法問誰教。辰樓修曲了簾靜。不惜晨書玉腕勞。烏絲細膩瓊牋疊。七籤書啓雲珠笈。想見琳窗染翰時。羽衣墨漬靈香濕。左嘯金晨右玉華。紫微中夜授餐霞。解參青錄真仙品。愛寫黃庭是大家。金鑑玉佩珍秦璧。琉璃硯冷調雲液。寶錄行行倒薤文。仙書幅幅簪花格。內外篇分上下章。五千言寫十三行。蘭金押尾綢繆印。小字分明認韻香。沈檀匣啓金煙歇。蠶眠小注窮毫髮。爲愛蘭淵玉朗姿。焚香讀盡桃花月。我亦人間小謫身。碧城回首隔紅塵。扁舟他日蘭陵道。歸路先尋寫韻人。

鳳城春柳詞

萬樹垂楊拂地生。東風不斷早鶯聲。樓臺金碧春波綠。疏雨和煙畫禁城。
雁齒平鋪玉竦橋。春痕半抹露初消。漏聲未斷宮鴉起。一路紅燈正早朝。
花嶼蓮塘舊蹟多。國初詩老盡消磨。堂前萬柳傷心樹。其奈春深似雪何。
走馬晴郊小隊迎。催花風急畫旗輕。春煙綠到香山寺。便是將軍細柳營。
不管長條與短條。絲絲跪地總無聊。珠簾日暮東風急。猶與燕姬鬪舞腰。
城南韋曲訪名園。煙景迷離隔水看。記得春遊曾拾翠。紅泥亭子碧闌干。
嫩晴風日稱春衫。慣向壘頭繫客驂。燕子樓臺天樣遠。教人那不憶江南。
一半心經野燒空。翠微深處斷垣紅。西山七百前朝寺。春在濛濛細雨中。
繁華如夢易銷魂。宿草紅心尚有根。惆悵宮人斜畔路。和煙和雨到黃昏。
三月春風綠未齊。早鶯啼過晚鴉啼。勞勞最是盧溝樹。半送車輪半馬蹄。

桃花夫人

卽息夫人也。按列女傳。紀楚伐息。虜其君使守門。夫人與賦穀則異室之詩。要以同死。是夫人固
以死殉息侯。與左氏所載異。近徐朗齋撰桃花夫人廟碑。專據旨左。予作此篇以矯之。庶幾風人
忠厚之旨云爾。

桃花不語含春煙。花落辭枝春可憐。花飛片片漢江曲。桃花自紅江自綠。故君恩重肯惜身。巫山空說陽臺雲。穀則異室死同穴。桃花淚染胭脂血。美人死不嫁東風。至今花開成慘紅。黯黯蒼梧雲一縷。瀟湘竹枝啼夜雨。

題長洲女士李紉蘭佩金生香館集

不信紅閨有此木。淋浪墨瀋化瓊瑰。瀟湘竹許裁斑管。瑤瑁簾應序玉臺。麗句不嫌花綽約。苦吟常共月徘徊。早知詩思清於雪。曾見驚鴻小影來。

如此聰明便合愁。無聊心事託悲秋。紅鸚未許知前世。白鳳空勞慕遠遊。二月落花如夢短。一江春水向東流。瑤清女伴如相憶。花葉絨題寄十洲。

碧海青天寫性靈。裁花作骨亦瓏玲。早梅春淺凭妝檻。暮竹寒多倚翠屏。應與素娥居璧月。須知玉女是明星。賞音省識人間少。一曲冰絃愛獨聽。

紫簫親自按宮商。細膩填詞更擅場。石帚暗香追北宋。羅衾夜雨怨南唐。吟成澹月疏簾下。寫向春風玉鏡旁。百幅烏絲應倍惜。簪花親仿十三行。

贈如意館畫士

大纛高牙十萬師。征西諸將捷書遲。凌煙有閣無人上。閒煞丹青筆一枝。

題金粟道人像

淖湖水碧春潮寒。莓苔綠上紅闌干。草堂夜雨寫金粟。彩筆春風題玉山。玉山才子神仙亞。繡戶疏窗富
臺榭。山爲詞人許姓康。墩因宰相曾呼謝。紅鸚畫檣碧螺觴。海內名流翰墨場。暮雪枇杷香酒國。秋霜橘
柚譙漁莊。珠簾不卷寒蟾瘦。滿身花影眞如繡。畫屏倚醉賦金裙。銀燭傳花圍翠袖。翠袖何人最擅名。花
遊一曲小瑤英。玉鸞孤咽春橫篴。金雁斜飛夜按箏。美人能歌客能舞。鐵撥檀槽響春雨。主人擘阮技尤
精。當筵自製新翻譜。豪竹哀絲滿四筵。座中裙屐盡翩翩。一編雅集風流甚。海內承平八十年。龍飛淮甸
眞人起。鐵騎橫江三百里。王氣仍從建業開。豪家都傍臨淮徙。徙盡江南五萬家。故園山水賸繁華。蒼涼
寫出遺民意。吟煞秋棠滿地花。武略將軍國恩重。眼前常抱河山痛。三生花月總成塵。五陵鞍馬眞如夢。
興亡如此劇堪哀。何處青山骨可埋。自寫丹青寄寥落。儒衣僧帽道人鞋。當年俊侶空如昨。倪楊老輩都
蕭索。載花人憶謝家湖。洗桐誰訪雲林閣。後來爭寫草堂圖。瘦石寒梅定有無。惆悵芙蓉花下水。漁童小
榜唱菰蒲。

題錢叔美洞庭春夢圖

孤雁墮遙渚。九嶷橫暮煙。雨聲昏似夢。湖水遠於天。綠髻銷今夕。青琴感昔年。片帆成獨載。閒煞木蘭船。

題畫

偷閒自寫牽蘿意。飛絮空園日易斜。一幅瀟湘秋夢影。倚來翠袖是朱家。馬湘蘭竹
春雨秦淮水上舟。一枝紅影上眉樓。東風不結相思子。寫得桃花當寫愁。顧橫波桃花

眉樓曲

湘簾亞碧文窗綠。紅樓斜抱青溪曲。溪頭春水碧粼粼。照見曉妝人似玉。玉人嬌小不禁秋。南部煙花第一流。窗外春山青人畫。題名真合署眉樓。東南曉日樓前出。畫幔低垂玉奩密。浣花百幅薛濤牋。斑管一牀道昇筆。玉臺無事對芳蘭。夢入瀟湘小影寒。話到同心知有幾。薑芽惆悵寫輕紈。菊蕊藕鮮雕盤薦。顧家食品人猶羨。掃眉才子賦閒情。樓中長日開文讌。尙書江左擅才名。月病花愁最有情。團扇影中迴一顧。玉簫聲裏話三生。三生慧業姻緣重。蘭因絮果何年種。吹放東風第一枝。白門柳色春如夢。同心寶結合歡杯。珊瑚枕聯吟賦玉釵。卻月橫雲新樣好。香螺親試畫眉才。相逢底事還相別。江南芳草燕臺雪。南鴻遠道寄相思。鴛鴦小字繙雙纈。鳳城璧月十分圓。轉眼秋星又一年。綠髻重教看酒畔。畫裙親爲解燈前。檀雲萬里青天落。畢竟團圓踐佳約。話到更番苦憶情。渡河早雁填橋鵲。烏程秉軸臥豺狼。國步艱難未可量。列狀何人思報國。紛紛豸繡立神羊。女兒獨抱英雄識。慷慨相期盡臣節。諫草頻催削牘成。玉蟾滴露親磨墨。夜色甘拚瘦影孤。淒涼詔獄泣啼烏。畫羅宮燭雙花燼。尙對孤臣諫獵書。九閣恩重邀輕恕。江湖浩蕩容歸去。蔣山煙雨秣陵秋。曾是當年舊遊處。重泛秦淮水上舟。月明同過板橋頭。盛名當日喧桃葉。狎客猶譚舊畫樓。重來彷彿盧家燕。曲中姊妹邀相見。市隱園中話舊情。中林堂上開華讌。壽人樂府曲中傳。共憶前朝丁酉年。紫蓋花幢供繡佛。珠燈春酒讌羣仙。小部梨園識誰某。西望瑤池降王母。登場中翰乞纒頭。長跪監司將進酒。十曲燈屏絕妙詞。絳雲高閣寫烏絲。一彎眉月初三夜。香雪橫陳十萬枝。

春來同放西湖艇。鏡中自愛娉婷影。雨餘紅餞落花寒。月中白弔閒鷗冷。招提禮徧妙蓮花。小住湖樓倚暮霞。自酌清泉醅蘇小。前身玉貌憶天斜。寓公暫作湖山主。奉常甘受人妖侮。裏繡頻將嬌女嬉。雕檀心羨香嬰乳。重入春明百事驚。弓刀滿地黑山兵。扶攜夫婦兵間活。不分黃墟有再生。王師定鼎驅流寇。尙書富貴仍依舊。勸忠空寄虎頭書。但是貴人都有壽。男裝結束更無羣。翠帽烏裘玉立身。合璧龍鸞清漢字。丹書一品敕夫人。藥裏纏絲悲不起。從古佳人宜早死。閨房遭際似君稀。頑福豔名都備矣。尙書伉儷最情深。白髮黃門感不禁。高義有人憐故劍。悼亡無地覓遺簪。國初諸老工銘誄。不數南朝謝莊美。迎陵太史更多才。玉魚金椀詞尤綺。蕭寺荒寒寄玉棺。高僧禮懺說中元。慧光不化幽燐去。定向瑤臺跨采鸞。雕樞零落悲蛛網。妙光閣圯無人上。水仙羅幃畫蘭裙。絕代風姿空想像。翠袖朱家許共論。流傳遺蹟亦銷魂。細桃畫幅臙脂印。海內何人什襲存。妝臺春曉芙蓉面。蔣家近寶梅花硯。曾賦紅絲絕妙詞。簪花寫韻心尤戀。舊院啼烏夜有霜。當時金粉半銷亡。他年重過迷樓畔。應爲徐孀弔夕陽。

雙鸞鏡歌

秋潭晝靜菱花寒。瑤臺飛下白玉盤。尋常金粉照不得。中有比翼雙青鸞。鸞尾襍襍背滑。畫羽玲瓏振仙骨。流風宛轉香雪迴。斜拂銀河入秋月。月華蝕土青苔滋。鏡面繡澀凝胭脂。一點洞明化仙汞。想見玉人雙照時。玉人小別芙蓉冷。碎裂春冰寫孤影。青鳥難傳錦字書。獨臥女牀秋夢醒。何年攜爾共還鄉。壁月樓中照曉妝。乞繡鏡囊新樣好。並頭花下宿鴛鴦。

宋宮人餞汪水雲處

海門風起寒潮急。六宮花謝嬋娟泣。抱琴供奉入燕來。淚絲彈入冰絃濕。掩抑冰絃幾斷腸。家山何處恨茫茫。十年辛苦依瀛國。一曲離騷感世皇。半壁殘疆已如此。疊山披髮文山死。琴師尚許戴黃冠。何處蒼涼弔天水。八月秋風塞草肥。幾行征雁向南飛。夢魂已過黃河去。心戀君恩未忍歸。蘆溝折柳春明餞。分韻詩題水雲硯。天荒地老別離難。他生或者能重見。腸斷蛾眉十七人。傷心最是舊宮嬪。青天何處江南月。玉骨他年塞北塵。萬重香雪孤山樹。蹇驢短策君歸去。玉琴三弄弔芳魂。西陵風雨錢塘路。落日錢塘憶故都。當年宮殿冷西湖。六陵寂寞金鳧出。愁煞冬青叫夜烏。玉缸春酒蒲桃熟。陽關三疊秋雲裂。花滿貂裘玉帳寒。茫茫一片燕山雪。君不見木波憔悴寫秋懷。問訊梅花幾度開。惆悵黃金臺下客。此生應是不歸來。又不見獨夜悲歌寒月小。昭儀埋玉金姬老。都是當年餞別人。玉樓燈火悲芳草。吁嗟乎。一代興亡付劫灰。趙家殘局總堪哀。琵琶聲斷蘆笳起。莫唱玲瓏一翦梅。

送人出塞

大漠生煙落日平。黃河西上繞孤城。蒲桃酒熟踏琴急。唱煞陽關第四聲。

題王春波金鼈玉螻畫卷

新漲金鼈活。晴雲玉螻眠。峯巒屏上影。臺榭鏡中天。水氣金隄濕。松陰碧殿圓。偶然騎馬過。也抵小遊仙。
梧栢森仙嶂。芭蕉隔禁園。遙瞻壽星殿。近繞福華門。花近紅雙影。雲堆翠一痕。何須問羣玉。冊府是西昆。

聖孝尊文母。琳宮爲祝釐。佛煙縈寶篆。仙露結靈芝。鳳輦慈雲護。龍舟翠水移。蟠桃三百樹。紅徧萬年枝。
蓬萊前殿外。南望是瀛臺。禁旅嬉冰至。詞臣侍直來。雲山隨地湧。圖畫自天開。歸院聯鑣過。誰爲作賦才。
太液波如海。仙遊識帝家。柳低人字樹。蓮長並頭花。鷗鷺嫺簫鼓。魚龍識翠華。緣知明鏡裏。曾此照宮鴉。
對面瓊華島。天然好畫圖。重欄俯圓殿。仙境卽方壺。秋意涼新得。春陰澹欲無。迴環三海水。面面麗金鋪。
玉樹涵春室。珠簾寶月樓。一鷗閒細雨。雙鶴下新秋。禁柳分黃綬。宮花襲紫裘。親藩恩最重。曲宴侍宸遊。
珠斗橫河漢。祥煙護紫宸。水風吹作雨。落月澹如塵。柳影迷金勒。荷香擁畫輪。紅燈花下過。知是早朝人。
白塔中天起。青山上幾盤。層層迴石磴。面面出紅闌。法雨飛金界。和風靜鐵竿。黃圖千萬載。烽火祝平安。
聖武超前古。圖形說紫光。麒麟原有種。貔虎久成行。蜀棧猶留戍。秦軍尙裹糧。洗兵應漸近。星影掃機槍。
玉甕春苔洗。金盤碧露濃。晝長浮水箭。風定隔花鐘。劃界銀潢阻。迴瀾紫海重。畫橋香不斷。處處長芙蓉。
嵩呼聞萬歲。平揖景山齊。梨樹唐宮北。櫻桃晉苑西。遙連春雨暗。近接片雲低。風起紅棠暮。飛花散滿隄。
一鏡明於畫。經冰暖易消。波涵金海闊。源溯玉泉遙。春月蠶神殿。秋星織女橋。舊聞經考定。圖繪證前朝。
艮嶽黃封石。何年著此閒。西華開苑囿。北宋惜江山。螺髻盤空勢。蛾眉對仗班。千秋作殷監。豈獨在完顏。
最憶逢寒雪。微吟此地過。馬蹄香土少。鸞尾落花多。瑤島真如此。瓊林更若何。宮梅開幾樹。江左笑紅羅。
林密全疑雨。煙輕欲化雲。詩情虞學士。畫本李將軍。金碧樓臺合。丹青界畫分。王郎好身手。弄墨寫斜曛。

空庭獨立偶書所見

秋陰如夢紫苔肥。雨後新涼試袂衣。墮葉無聲簾不卷。斜風滿院白蛾飛。

灤縣畫眉塚。是張京兆葬處。

春柳千行碧。春山一抹勻。遙憐畫眉塚。曾葬畫眉人。

題金雲門女史禮齋畫謝芳姿秋風團扇圖

井梧葉落商聲急。羅衣單薄輕寒襲。白團扇底咽秋心。闌干玉筍蛾眉泣。蛾眉絕代謝芳姿。少長侯家作侍兒。修到紅顏嗟薄命。密香辛苦伴瑤池。小郎風調人間少。參軍新婦姻緣好。打鴨驚鴛各自飛。從來多事憎邱嫂。惆悵芳華怨奈何。盈盈小海唱迴波。訴將花下流離意。贏得風前憔悴歌。流離憔悴羞相見。春羅深掩芙蓉面。低窺珠箔認雕梁。雙栖空羨盧家燕。六朝遺恨半朱門。舊巷烏衣繫夢魂。天壤有人吟柳絮。空江何處覓桃根。此事豈容相決絕。阮家人種尤堪惜。何須書法笑羊欣。婢學夫人亦良得。此扇由來號合歡。願教璧月與團圓。玉臺雙照溫郎鏡。紅尾同驂秦女鸞。琅邪才子江南客。賃廡皋橋聊寄跡。碧水新開謝女祠。青山仍傍王郎宅。彷彿冰紈滴淚紅。美人有意寫秋風。願勞檢點氤氳簿。莫學班姬怨漢宮。

玉泉山訪金章宗芙蓉殿遺址

青山如畫晴雲變。玉泉春水流花片。金源此地有離宮。殘基人說芙蓉殿。霧閣雲窗四面懸。玉墀高壓翠微巔。華嚴古洞通仙路。尙憶明昌避暑年。道陵繼體規模振。授受親承小堯舜。徧覽宮中輿地圖。金蓮川上聞遺訓。萬方無事樂清遊。八院香林起畫樓。春山秋水年年幸。觀稼看花處處周。中都宮闕稱閎麗。經

營不獨蕭家置。玉華別觀署西涼。瓊林上苑連東翠。盤山迢遞接香山。多少珠簾曉翠寒。會景樓前金屈
戌。臨漪亭上玉闌干。此地當年盛樓閣。夜半天風語檐鐸。不羨西華潭畔花。芙蓉朵朵晴空落。白石千盤
翠嶂中。唐家空說九成宮。祭星臺下遲黃幄。一路輕陰護駕松。路轉峯迴隔蒼巘。古苔繡壁森重甌。妝臺
恩寵李元妃。當年在會同輩釣魚彈。雀最風流。領取清涼一度遊。壁月滿庭天似水。銀河捲幔夜如秋。
朔南偃革中原治。野史編年說遺事。御史頻陳諫獮書。儒生屢上籌邊議。姚村淀近薊州遙。頻歲巡方敢
憚勞。望雨更番祈北嶽。勸農親自出東郊。萬幾有暇耽文翰。購取遺書陳玉案。金壺灑墨亦揮毫。六字題
橋虹氣貫。五雲金碧寫烏絲。曾賦東風絕妙詞。更有中州遺集在。泰和五月牡丹詩。艱難王業思繩武。開
閣曾開放宮女。魚藻春和宴百官。鹿園秋老綏諸部。石聖臺高集鳳皇。史臣簪筆紀禎祥。綏藩橫賜高麗
使。納款新封蜀國王。瑤光罷起凌雲構。萬歲聲中祝天壽。年年此地翠華來。輦路不教黃土覆。後人失計
意如何。次第南邊阻汴河。花石蒼涼悲艮嶽。分明覆轍學宣和。崖空駐蹕秋風冷。茶樓石柱埋殘梗。祇有
山前裂帛湖。當年曾照樓臺影。依舊西山作畫屏。鳳笙無復倚樓聽。千尋古栝何年植。尙與芙蓉一樣青。

題羅兩峯補畫西湖社集圖

明何雪漁爲馬湘蘭鑄浮生半日閒小印。旁題識云。壬子穀日。同藍田叔、董元宰、崔長羽、梁千秋、
社集西湖舟中。女士馬湘蘭索刊云。此印爲彭愛園所藏。羅兩峯爲之補圖。乾隆辛亥。王秋陸、
沈又村、陳理堂、錢季重、吳嘯鶴、銷寒雅集。曾賦此題。今圖歸楊蓉裳農部。農部作長歌紀之。余系

以十絕句。

落葉寒蕪舊院街。芳名何處問秦淮。荒園日暮停飛絮。一曲清溪弔玉釵。
東風吹上木蘭舟。春到蘇家樹外樓。一個佳人五名士。劇憐此會亦千秋。
小字新鐫玉篆斜。何郎鐵筆舊名家。紅泥尙帶胭脂暈。押徧同心幾幅花。
畫中人與鏡中山。難得浮生半日閒。翠袖練裙都化蝶。但留片石在人閒。
梵字雕檀好護持。香黏粉浣撫蟠螭。梁園賓客真風雅。對雪頻題七字詩。
羅含畫筆蕭閒甚。重補西湖社集圖。未展冰紈先一笑。不知曾寫玉鉤無。
江南詞客楊農部。第一多情絕世才。題到詩魂零落句。笛聲鄰巷不勝哀。
細雨窗前短燭燒。披圖重爲話前朝。漫云酒是消愁物。似此閒愁恐未消。
憶娘小影眉生印。海內珍藏二百春。此集此圖應倍惜。紅妝季布復何人。
我憶段家橋畔路。青山常對美人看。鳳雛已嫁芳蘭瘦。紅豆銷魂餞暮寒。

中秋夜獨坐

客況消佳夕。於今又幾年。秋如人意澹。月是故鄉圓。花氣破微醉。蟲聲警獨眠。夜香星斗裏。夢憶桂堂前。

題杜蘭香畫像

湘草湘花託姓名。五銖衣薄御風行。大羅天上春如夢。小謫人間月有情。金母前頭閒弄瑟。瑤姬隊裏學

吹笙。何當乞取長生藥。鸞鶴相隨上碧城。

題吳絳仙畫眉圖

璧月團團貼寒玉。菱花香散沈檀櫃。鏡裏何人絕代姿。自寫長眉點蛾綠。憶昔君王南幸年。三千殿腳盡嬋娟。春波照影流紋媚。第一風流說絳仙。橫雲卻月生纖手。絳仙眉黛真無偶。淮浦何勞認遠山。汴隄不必誇新柳。柳影山痕未許同。夫人封號敕崆峒。媼姬祇合藏金屋。嬌嬈何容嫁玉工。月觀清寒愁獨處。北苑新妝好眉嫵。學畫雅黃半未勻。愁生應笑司花女。分明桃葉渡江來。笑倚新妝賦落梅。日日司宮給螺子。六宮爭羨畫眉才。合歡雙果君恩賜。淒涼無復同心意。空憐才藻似相如。紅牋親報鴛鴦字。從古蛾眉國色難。玉鉤芳草怨春寒。沈吟寶帳延秋月。畫裏依然秀可餐。

秋夜

梧桐葉底見銀河。露氣當窗冷碧羅。四壁蟲聲兩行雁。不知何處得秋多。

秋雁和李紉蘭女史

冰絃急雪響平沙。目送高飛入斷霞。關塞相逢惟木葉。江天何處不蘆花。月中人字排千點。枕上秋聲落萬家。一樣悲涼驚旅夢。新霜前夜入邊笳。牧馬依然未解圍。江南空計稻粱肥。五更風急斜銀漢。萬幕秋深冷鐵衣。蜀道頻催圓陣合。衡陽猶避戰塵飛。天涯迢遞西風急。辛苦年年換燕歸。

瀟湘煙景畫屏虛。秋入高樓怨綺疏。冰簟塵生人去後。金河風定夜涼初。綠腰久卸銀箏柱。素手親裁錦字書。惆悵征夫三載別。關心烽火近何如。
孤館宵寒滅燭聽。鳳城南畔客愁侵。雪泥渺渺空陳迹。雲水茫茫寄遠音。千里飄零湖海夢。經年離別弟兄心。登樓目斷吳天碧。菰米莓苔次第吟。

附錄

李佩金 綴闕

無端燕市起悲歌。帶得商聲又渡河。千里秋心隨月遠。一年愁緒入秋多。水邊就夢雲無影。天際驚寒夜有波。屈宋風流零落盡。那堪重向洞庭過。
晚來風雨曉來霜。不爲悲秋也斷腸。蘆葦作花多冷澹。鷺鷥無語亦淒涼。途窮容易迷歸路。棲穩何如在故鄉。一種白頭緣底事。田田祇解覆鴛鴦。
誰倚高樓一簾橫。憑空吹落苦吟聲。能鳴未必真爲福。有迹多嫌累此生。人世豈容矰繳避。就人終覺羽毛輕。越鼻楚乙休題品。識字何曾爲近名。
夜庭飛渡恨漫漫。多恐江南到亦難。偶聽弓弦驚寤寐。久疏牋字報平安。箏無急柱甯辭鼓。琴有哀音未忍彈。可奈西風吹別調。離羣還較此閒寒。

待月

深夜見殘月。清光如許寒。遲遲上簾幙。寂寂照闌干。孤影瘦於菊。妙香清若蘭。一燈供燭坐。還檢舊詩看。

題金匱女士楊蕊淵芸琴清閣集

梁溪詩老舊名家

蕊淵爲紫裳農部愛女

家學親傳到碧紗。林下風清推道韞。盤中句好報秦嘉。錦囊夜織龍紋鏤。斑

管春開蝶夢花。不信品題到溫李。祇因仙骨最清華。

玉臺風細靜無塵。六曲圍屏護好春。燈下繙書閒課弟。酒邊覓句爲娛親。三生慧業尋瑤島。七寶莊嚴拜

洛神。爲問蓬萊諸女伴。海天傳唱更何人。

惜春心緒似悲秋。眞箇檐前卽玉鉤。繡口慣談千古恨。仙心總帶一分愁。花盟月社聯吟館。燭暗香沈倚

畫樓。莫卷珠簾奏神雪。闌干怕有水雲浮。

芳蘭吹氣靜如煙。吟到遊仙一惘然。花葉題詞雲綽約。藕絲織句夢纏綿。六朝古月回文字。七夕明河雅

集篇。累我殷勤讀深夜。然脂寫盡鯉魚牋。

漢趙飛燕玉印歌

昆刀割雪流春乳。宛轉雙螭靜無語。胭肢紅暈漢宮春。小印流傳趙宜主。宜主風流舊有名。漢家天子重
傾城。平陽歌舞春如海。一顧當筵早目成。使娟最得君王意。蛤帳宵明玉顏麗。石華廣袖紫英裙。頃刻六
宮傳故事。蛾眉當日正中宮。椒殿香生四壁紅。赤鳳歌中春正好。綠熊席上暖初融。此印氤氳蘊蘭麝。雕
鏤小字珍無價。藏處惟宜金屑茵。裏來定展香羅藉。精金彊指幾番拈。紫玉膏盛碧玉奩。樊姬簿中湘碧
亞。彭蠡書上桂紅鈴。遠條別館開春宴。歸風送遠留題徧。省識何方署最多。七寶屏風九華扇。卷髮新妝

麗曉霞。更聞女弟擅容華。金釭銜壁流蘇帶。爭羨昭陽第一花。再拜嘉辰貴人姊。奏書定亦工文史。蓮碗同心菱鏡圓。芳鏡照字明如水。亦有當年辭輦人。甘心明月照長門。淒涼一卷東宮賦。華殿蕭條起暗塵。木門零落倉琅朽。赫蹏書字令何有。祇餘片玉暈桃花。仙乎曾綰織纖手。宮闕西京事總非。鳳皇琴斷冷金徽。一函留得藍田璧。莫化釵頭白燕飛。

題蔣蓉岑女史慧珠仙意圖

羅雲無定水微波。一棹仙槎渡絳河。不道瓊樓秋似水。五銖衣薄峭寒多。桂樹婆娑蔭畫闌。霓裳一曲韻珊瑚。晚風涼透芙蓉骨。始信仙宮號廣寒。

美人擘阮

蘭房夜靜華月明。芙蓉花落秋潮生。十三鈿柱金雁橫。非琴非瑟非秦箏。銅槽宛轉冰絃清。明珠瀉作流波聲。美人花貌何娉婷。修眉豐頰纖桂輕。含愁含怨難爲情。難爲情。復難說。長相思。久離別。巫山高。高湘水闊。天上銀河劃空碧。金井鴉啼玉階雪。春華遲暮秋芳歇。曲中聲斷羅衣濕。離離北斗夜向闌。迴身斂袂玉指寒。錦囊收拾銀甲卸。同心未遇休輕彈。

初月

初月照殘雪。晴光不在多。微微寒有暈。脈脈澹生波。燭暗簾前影。樽銷醉後歌。畫樓千里隔。其奈客情何。

宮中夜寒曲

玉壺蓮花澀龍子。軟鼻抱煙飄不起。長門魚鑰封古苔。晚雁切雲天在水。金猊繡帳流蘇輕。紅雪冷香瑤
畫屏。曲巷峭風入簾縫。缸花夜笑搖暗燈。殘牀寶瑟影同宿。冰絃無聲裏秋玉。燕支雙筋凝紅冰。粒粒寒
擢玉肌粟。凍星流影窺朱闌。霜月上階明夜殘。鸚鵡不眠喚羅幙。金盤花碎滋幽蘭。翠被生寒夢銅輦。二
十五聲怨秋點。複道笙歌方奉恩。鄭重芳年知夜短。